

修武縣志卷八

修武縣知縣馮繼照纂輯

人物志

列傳

忠節

孝友

義行

流寓

方外

扶輿清淑之氣太行之靈秀清水之淪漪不能獨當之也必有偉人碩士出而應之其大者經綸幹濟增光史冊固炳如日星矣而忠節孝義之士代不乏人景仰前哲不能無望於後來也至若名賢之芳躅方外之潛修遊履所至皆足以點綴風景故併錄之以資參攷云

列傳

周

修武縣志

卷八

人物志

列傳

一

倉葛春秋傳僖二十五年晉於是始啟南陽陽樊不服圍之倉葛呼曰德以柔中國刑以威四夷宜吾不敢服也此誰非王之親姻其俘之也乃出其民

杜注倉葛樊陽人國語韋注倉葛陽樊人十三經校勘記石經宋本淳熙本岳本蒼作倉注同宋本淳熙本岳本足利本樊陽作陽樊不誤

晉語陽人不服圍之將殘其民倉葛呼曰陽人未狎君德而未敢承命君將殘之無乃非禮乎陽有夏商之嗣典有周室之師旅樊仲之官守焉其非官守則皆王之父兄甥舅也君定王室而殘其

族民將焉放敢私布之於夷唯君圖之公曰君子也迺出陽人

晉史乘出陽民第十一周襄王以陽樊賜晉文公陽人不服晉侯圍之倉葛呼曰王以晉君爲德故勞之以陽樊陽樊懷我王德是以未從於晉謂君其何德之布以懷柔之使無有遠志今將大泯其宗祊而蔑殺其民人宜吾不敢服也夫三軍之所尋將蠻夷戎翟之驕逸不虔於是乎致武此羸者陽也未狎君政故未承命君若惠及之唯官是徵其敢逆令何足以辱師君之武震無迺玩而頓乎臣聞之曰武不可覲文不可匿覲武無烈匿文不

修武縣志

卷八

人物志 列傳

二

昭陽不承獲甸而祇以覲武臣是以懼不然其敢自愛也且夫陽豈有裔民夫亦皆天子之父兄甥舅也若之何其虐之也晉侯聞之曰君子之言也迺出陽民

甯羸春秋左傳晉陽處父聘於衛反過甯甯羸從之及溫而還其妻問之羸曰以剛商書曰沈潛剛克高明柔克夫子壹之其不沒乎天爲剛德猶不干時况在人乎且華而不實怨之所聚也犯而聚怨不可以定身余懼不獲其利而離其難是以去之

杜注甯晉邑汲郡修武縣也羸逆旅大夫孔穎達

正義曰晉語說此事云舍於逆旅甯嬴氏注國語者賈逵孔晁皆以甯嬴爲掌逆旅之大夫故杜亦同之劉炫以甯嬴直是逆旅之主非大夫今刪定知不然若是逆旅之主則身爲匹庶是卑賤之人猶如重館人告文仲重邱人罵孫蒯止應稱人而已何得名氏見傳杜以傳載名氏故爲逆旅大夫劉炫以爲客舍主人而規杜氏非也

國語陽處父如衛反過甯舍於逆旅嬴氏嬴謂其妻曰吾求君子久矣迺今得之舉而從之陽子道與之語及山而還其妻曰子得所求而不從之何其懷也曰吾見其貌而欲之聞其言而惡之夫貌

修武縣志

卷八

人物志 列傳

三

情之華也言貌之機也身爲情成於中言身之文也言文而發之合而後行離則有釁今陽子之貌濟其言匱非其實也若中不濟而外彊之其卒將復中外易矣若外內類而言及之瀆其信也夫言以昭信奉之如機歷時而發之胡可瀆也今陽子之情譏矣以濟蓋也具剛而主能不本而犯怨之所聚也吾懼未獲其利而及其難是故去之期年迺有賈季之難陽子死也

修武縣志

卷八

人物志

列傳

四

後漢

衛颯字子產河內修武人也家貧好學問隨師無糧常傭以自給王莽時仕郡歷州宰建武二年辟大司徒鄧禹府舉能案劇除侍御史襄城令政有名迹遷桂陽太守郡與交州接境頗染其俗不知禮則颯下車修庠序之教設婚媾之禮期年間邦俗從化先是含滙潁陽曲江三縣越之故地武帝平之內屬桂陽民居深山濱溪谷習其風土不出田租去郡遠者或且千里吏事往來輒發民乘船名曰傳役每一吏出徭及數家百姓苦之颯迺鑿山通道五百餘里列亭傳置郵驛於是役省勞息

姦吏杜絕流民稍還漸成聚邑使輸租賦同之平民又耒陽縣出鐵石他郡民庶常依因聚會私爲冶鑄遂招來亾命多致姦盜颯乃上起鐵官罷廢私鑄歲所增入五百餘萬颯理卹民事居官如家其所施政莫不合於物宜視事十年郡內清理二十五年徵還光武欲召爲少府會颯被疾不能拜起勅召桂陽太守歸家須後詔書居二歲載病詣闕自陳困篤乃收印綬賜錢十萬後卒於家循吏傳張導水經注銅馬祠側有碑述河內修武縣張導字景明以建和三年爲鉅鹿太守漳津汎濫土不稼穡導披按地圖與丞彭參掾馬道嵩等原其逆

修武縣志

卷八

人物志 列傳

五

順揆其表裏修防排通以正水路功績有成民用

嘉賴題云漳河神壇碑

建和當作建安趙一清有辨

張歆字敬讓官司徒

張延字公威歆之子官太尉

案後漢書桓帝建和三年冬十月大司農河內張歆爲司徒注歆字敬讓惠棟後漢書補注歆修武人見魏志元嘉元年夏四月司徒歆罷又靈帝中平二年夏五月太僕河南張延爲太尉注延字公威歆之子後漢書補注河內誤作河南三年春二月太尉張延罷冬十月前太尉張延爲宦人所讎下獄死案補注謂延爲歆子則延亦修武人也

蔡湛字子德河內修武人舉孝廉辟讓應司徒府除廣川長復辟太尉熹平四年六月詔書遷藁長又遷高邑令吏民追思於是故吏栗尹等相與合會立碑起頌光和四年十二月詔書遷并州刺史

洪道
隸釋

魏

張範字公儀河內修武人也祖父歆爲漢司徒父延爲太尉太傅袁隗欲以女妻範範辭不受性恬靜樂道忽於榮利徵命無所就弟承字公先亦知名以方正徵拜議郎遷伊闕都尉董卓作亂承欲合徒眾與天下共誅卓承弟昭時爲議郎適從長

修武縣志

卷八

人物志 列傳

六

安來謂承曰今欲誅卓眾寡不敵且起一朝之謀戰阡陌之民士不素撫兵不練習難以成功卓阻兵而無義固不能久不若擇所歸附待時而動然後可以如志承然之迺解印綬閒行歸家與範避地揚州袁術備禮招請範稱疾不往術不彊屈也遣承與相見術問曰昔周室陵遲則有桓文之霸秦失其政漢接而用之今孤以土地之廣士民之眾欲徼福齊桓擬跡高祖何如承對曰在德不在彊夫能用德以同天下之欲雖由匹夫之資而與霸王之功不足爲難若苟僭擬干時而動眾之所棄誰能興之術不悅是時太祖將征冀州術復問

日今曹公欲以弊兵數千敵十萬之眾可謂不量力矣子以爲何如承迺曰漢德雖衰天命未改今曹公挾天子以令天下雖敵百萬之眾可也術作色不懾承去之太祖平冀州遣使迎範範以疾留彭城遣承詣太祖太祖表以爲諫議大夫範子陵及承子戩爲山東賊所得範直詣賊請二子賊以陵還範範謝曰諸君相還兒厚矣夫人情雖愛其子然吾憐戩之小請以陵易之賊義其言悉以還範太祖自荊州還範得見於陳以爲議郎參丞相軍事甚見敬重太祖征伐常令範及邴原留與世子居守太祖謂文帝舉動必諮此二人世子執子

修武縣志

卷八

人物志

列傳

七

孫禮救卹窮乏家無所餘中外孤寡皆歸焉贈遺無所逆亦終不用及去皆以還之建安十七年卒魏國初建承以丞相參軍祭酒領趙郡太守政化大行太祖將西征徵承參軍事至長安病卒

三國志本傳

裴松之魏書注曰文帝卽位以範子參爲郎中承孫邵晉中護軍與舅楊駿俱被誅事見晉書

晉

向雄字茂柏河內山陽人也父韶彭城太守雄初仕郡爲主簿事太守王經及經之死也雄哭之盡哀市人咸爲之悲後太守劉毅嘗以非罪笞雄及

吳奮代毅爲太守又以少譴繫雄於獄司隸鍾會於獄中辟雄爲都官從事會死無人殯殮雄迎喪而葬之文帝召雄而責之曰往者王經之死卿哭王經於東市我不問也今鍾會躬爲叛逆又輒收葬若復相容其如王法何雄曰昔者先三掩骼埋齒仁流朽骨當時豈先卜其功罪而後葬之哉今王誅旣加於法已備雄感義收葬教亦無闕法立於上教宏於下何必使雄違生背死以立於時殿下讎枯骨而捐之中野爲將來仁賢之資不亦惜乎帝甚悅與談宴而遣之累遷黃門侍郎時吳奮劉毅俱爲侍中同在門下雄初不交言武帝聞之

修武縣志

卷八

人物志

列傳

八

勅雄令復君臣之好雄不得已迺詣毅再拜曰向被詔命君臣義絕如何於是卽去帝聞而大怒問雄曰我令卿復君臣之好何以故絕雄曰古之君子進人以禮退人以禮今之進人若加諸郤退人若墜諸川劉河內於臣不爲戎首亦已幸甚安復爲君臣之好帝從之秦始皇中累遷秦州刺史假赤幢曲蓋鼓吹賜錢二十萬咸寧初入爲御史中丞遷侍中又出爲征虜將軍太康初爲河南尹賜爵關內侯齊王攸將歸藩雄諫曰陛下子弟雖多然有名望者少齊王臥在京邑所益實深不可不思帝不納雄固諫忤旨起而徑出遂以憤卒弟匡惠

帝世為護軍將軍

晉書本傳

荀晞字道將河內山陽人也少為司隸部從事校尉石鑿深器之東海王越為侍中引為通事令史累遷陽平太守齊王冏輔政晞參冏軍事拜尙書右丞轉左丞廉察諸曹八座以下皆側目憚之及冏誅晞亦坐免長沙王父為驃騎將軍以晞為從事中郎惠帝征成都王穎以為北軍中候及帝還洛陽晞奔范陽王虓虓承制用晞行兖州刺史汲桑之破鄴也東海王越出次官渡以討之命晞為前鋒桑素憚之於城外為柵以自守晞將至頓軍休士先遣單車示以禍福桑服大震棄柵宵遁嬰

修武縣志

卷八

人物志

列傳

九

城固守晞陷其九壘遂定鄴而還西討呂朗等滅之從高密王泰討青州賊劉根破汲桑故將公師藩敗石勒於河北威名甚盛時人擬之韓白進位撫軍將軍假節都督青兗諸軍事封東平郡侯邑萬戶晞練於官事文簿盈積斷決如流人不敢欺其從母依之奉養甚厚從母子求為將晞拒之日吾不以王法貸人將無後悔邪固欲之晞適以為督護後犯法晞杖節斬之從母叩頭請救不聽既而素服哭之流涕日殺卿者兖州刺史哭弟者荀道將其仗法如此晞見朝政日亂懼禍及己而多所交結每得珍物即貽都下親貴兖州去洛五百

里恐不鮮美募得千里牛每遺信且發暮還初東海王越以晞復其讐恥甚德之引升堂結爲兄弟越司馬潘滔等說曰兗州要衝魏武以之輔相漢室苟晞有大志非純臣久令處之則患生心腹矣若遷於青州厚其名號晞必悅公自牧兗州經緯諸夏藩衛本朝此所謂謀之於未有爲之於未亂也越以爲然迺遷晞征東大將軍開府儀同三司加侍中假節都督青州諸軍事領青州刺史進爲郡公晞迺多置參佐轉易守令以嚴刻立功日加斬戮流血成川人不堪命號曰屠伯頓邱太守魏植爲流人所逼眾五六萬大掠兗州晞出屯無鹽

修武縣志

卷八

人物志 列傳

十

以弟純領青州刑殺更甚於晞百姓號小苟酷於大苟晞尋破植時潘滔及尙書劉望等共誣陷晞晞怒表求滔等首又請越從事中郎劉洽爲軍司越皆不許晞於是昌言曰司馬元超爲宰相不平使天下淆亂苟道將豈可以不義使之韓信不忍衣食之惠死於婦人之手今將誅國賊尊王室桓文豈遠哉迺移告諸州稱己功伐陳越罪狀時懷帝惡越專權迺詔晞曰朕以不德戎車屢興上懼宗廟之累下愍兆庶之困當賴方嶽爲國藩翰公威震赫然梟斬藩桑走降喬朗魏植之徒復以誅除豈非高識明斷朕用委成加王彌石勒爲社稷

之憂故有詔委統六州而公謙分小節稽違大命
非所謂與國同憂也今復遣詔便施檄六州協同
大舉翦除國難稱朕意焉晞復移諸征鎮州郡曰
天步艱險禍難殷流劉元海造逆於汾陰石世龍
階亂於三魏荐食畿甸覆喪鄴都結壘近郊仍震
兗豫害三刺史殺二都督郡守官長湮沒數十百
姓流離肝腦塗地晞以虛薄負荷國重是以弭節
海隅援枹曹衛猥被中詔委以關東督統諸軍欽
承詔命剋今日二日當西經濟黎陽即日得滎陽
太守丁嶷白事李暉陳午等救懷諸軍與羯大戰
皆見破散懷城已陷河內太守裴整爲賊所執宿

修武縣志

卷八

人物志 列傳

十一

衛闕乏天子蒙難宗廟之危甚於累卵承問之日
憂歎累息晞以爲先王選建明德庸以報章所以
藩固王室無俾城壞是以舟楫不固齊桓責楚襄
王逼狄晉文致討夫翼獎皇家宣力本朝雖陷湯
火大義所甘加諸方牧俱授榮寵義同畢力以報
國恩晞雖不武首啟戎行秣馬裹糧以俟方鎮凡
我同盟宜同赴救顯立名節在此行矣會王彌遣
曹嶷破琅邪北攻齊地苟純城守嶷眾轉盛連營
數十里晞還登城望之有懼色與賊連戰輒破之
後簡精銳與賊大戰會大風揚塵晞遂敗績棄城
夜走嶷追至山東部眾皆降嶷晞單騎奔高平收

邸閣募得數千人帝又密詔晞討越晞復上表曰
殿中校尉李初至奉被手詔肝心若裂東海王越
得以宗臣遂執朝政委任耶佞寵樹姦黨至使前
長史潘滔從事中郎畢邈主簿郭象等操弄天權
刑賞由己尙書何綏中書令繆播太僕繆允黃門
侍郎應紹皆是聖詔親所抽拔而滔等妄構陷以
重戮帶甲臨宮誅討后弟翦除宿衛私樹國人崇
弊魏植招誘逋匹覆喪州郡王塗圯隔方貢乖絕
宗廟闕烝嘗之饗聖上有約食之匱鎮東將軍周
馥豫州刺史馮嵩前北中郎將裴憲竝以天朝空
曠權臣專制事難之興慮在旦夕各率士馬奉迎

修武縣志

卷八

人物志 列傳

十三

皇輿思隆王室以盡臣禮而滔邈等劫越出關矯
立行臺逼徙公卿擅爲詔令縱兵寇鈔茹食居人
交尸塞路暴骨盈野遂令方鎮失職城邑蕭條淮
豫之氓陷離塗炭臣雖憤懣守局東嶠自奉明詔
三軍奮厲卷甲長驅次於倉垣卽日承司空博陵
公浚書稱殿中中郎劉權齋詔敕浚與臣共剋大
舉輒遣前鋒征虜將軍王讚徑至項城使越稽首
歸政斬送滔等伏願陛下寬宥宗臣聽越還國其
餘逼迫宜蒙曠蕩輒寫詔宣示征鎮顯明義舉遣
揚烈將軍閻宏步騎五千鎮衛宗廟五年帝復詔
晞曰太傅信用姦佞阻兵專權內不遵奉皇憲外

不協比方州遂令戎狄充庠所在犯暴畱軍何倫
鈔掠官寺劫剝公主殺賢害士悖亂天下不可忍
聞雖惟親親宜明九伐詔至之日其宣告天下率
齊大舉桓文之績一以委公其思盡諸宜善建安
略道澀故練寫副手筆示意晞表曰奉被手詔委
臣征討喻以桓文紙練兼備伏讀跪歎五情惶惶
自頃宰臣專制委仗佞邪內擅朝威外殘兆庶矯
詔專征遂圖不軌縱兵寇掠陵踐官寺前司隸校
尉劉噉御史中丞溫畿右將軍杜育竝見攻劫廣
平武安公主先帝遺體咸被逼辱逆節虐亂莫此
之甚輒祇奉前詔部分諸軍遣王讚率陳午等將

修武縣志

卷八

人物志 列傳

三

兵詣項龔行天罰初越疑晞與帝有謀使游騎於
成臯間獲晞使果得詔令及朝廷書遂大搆疑隙
越出牧豫州以討晞復下檄說晞罪惡遣從事中
郎楊瑄爲兗州與徐州刺史裴盾共討晞晞使騎
收河南尹潘滔滔夜遁迺執尙書劉曾侍中程延
斬之會越薨盾敗詔晞爲大將軍大都督督青徐
兗豫荆揚六州諸軍事增邑二萬戶加黃鉞先官
如故晞以京邑荒饉日甚寇難交至表請遷都遣
從事中郎劉會領船數千艘宿衛五百人獻穀千
斛以迎帝朝臣多有異同俄而京師陷晞與王讚
屯倉垣豫章王端及和郁等東奔晞晞率羣官尊

端爲皇太子置行臺端承制以晞領太子太傅
督中外諸軍錄尚書自倉垣徙屯蒙城讚屯陽夏
晞出於孤微位至上將志頗盈滿奴婢將千人侍
妾數十終日累夜不出戶庭刑政苛虐縱情肆欲
遼西閻亨以書固諫晞怒殺之晞從事中郎明預
有疾居家聞之迺舉病諫晞曰皇晉遭百六之數
當危難之機明公親稟廟算將爲國家除暴闢亨
美士柰何無罪一旦殺之晞怒曰我自殺閻亨何
關人事而舉病來罵我左右爲之戰慄預曰以明
公以禮見進預欲以禮自盡今明公怒預其若遠
近怒明公何昔堯舜之在上也以和理而興桀紂

修武縣志

卷八

人物志

列傳

齒

之在上也以惡逆而滅天子且猶如此况人臣乎
願明公且置其怒而思預之言晞有慙色由是眾
心稍離莫爲致用加以疾疫饑饉其將溫畿傳宣
皆叛之石勒攻陽夏滅王讚馳襲蒙城執晞署爲
司馬月餘迺殺之晞無子弟純亦遇害

晉書
本傳

宋

向靖字奉仁小字彌河內山陽人也名與高祖同
改稱小字世居京口與高祖少舊從平京城參建
武軍事進平京邑板參鎮軍軍事加寧遠將軍京
邑雖平而羣寇互起彌與劉蕃孟龍符征破桓歆
桓石康石綏於白茅攻壽陽剋之義熙三年遷建

武將軍秦郡太守北陳留內史成堂邑以平京城
功封山陽縣五等侯從征鮮卑大戰於臨朐累月
不決彌與檀詔等分軍自間道攻臨朐城彌擐甲
先登卽時潰陷斬其牙旗賊遂奔走攻拔廣固彌
又先登盧循屯據蔡洲以親黨阮賜爲豫州刺史
攻逼姑孰彌率譙國內史趙恢討之時輔國將軍
毛修之戍姑孰告急續至彌兼行進討破賜收其
輜重除中軍諮議參軍將軍如故盧循退走高祖
南征彌爲前鋒於南陵電池左里三戰並大捷軍
還除太尉諮議參軍下邳太守將軍如故八年轉
游擊將軍尋督馬頭淮西諸郡軍事龍驤將軍鎮

修武縣志

卷八

人物志

列傳

五

蠻護軍安豐汝陰二郡太守梁國內史成壽陽以
平廣固盧循功封安南縣男食邑五百戶十年遷
冠軍將軍高陽內史臨淮太守領石頭戍事高祖
西伐司馬休之以彌爲吳興太守將軍如故明年
高祖北伐彌以本號侍從留戍碭礮進屯石門柏
谷遷督北青州諸軍事北青州刺史將軍如故高
祖受命以佐命功封曲江縣侯食邑千戶遷太子
左衛率加散騎常侍二年卒官時年五十九追贈
前將軍彌治身儉約不營室宇無園田商貨之業
時人稱之子植嗣多過失不受母訓奪爵更以植
次第植南史紹封又坐殺人國除

植弟桺字元季有學義才能立身方雅無所推先
諸盛流竝容之太尉袁淑司空徐湛之東陽

顏竣本傳

作揚州刺史顏立

顏延之顏竣兩傳皆作竣

皆與友善歷始興王

濬征北中兵參軍始興內史南康相賊質為逆召

桺至尋陽與之俱下質敗歸降下獄死彌弟劭永

初中為宣城太守劭弟子亮以私忿殺彌妻施氏

託云奴客所殺劭輒於墓所殺亮及彌妾并奴婢

七八人匿不聞官為有司所奏詔無所問元嘉初

卒於義興太守

宋書本傳

附南史本傳向靖字奉仁小字彌河內山陽人也

名與武帝祖諱同故以小字行彌與武帝有舊從

修武縣志

卷八

人物志 列傳

其

平京城參建武軍事進平建業以功封山陽縣五

等侯又從征廣固討盧循所在著績封安南縣男

武帝西伐司馬休之征關中竝見任使及帝受命

以佐命功封曲江縣侯位太子左衛率加散騎常

侍卒於官彌立身儉約不營室宇無園田商貨之

業時人稱之子植嗣多過失不受母訓奪爵更以

植次第植紹封又坐殺人國除

植弟桺字元季有學義才能立身方雅太尉袁淑

司空徐湛之東揚州刺史顏竣皆與友善及竣貴

桺猶以素情自許不推先之順陽范璩誠桺曰名

位不同禮有異數卿何得作曩時意邪桺曰我與

士遜心期久矣豈可一旦以勢利處之及柳爲南康郡涉義宣事敗繫建康獄屢密請竣求相申救孝武嘗與竣言及柳事竟不助之柳遂伏法璩字伯玉平北將軍汪曾孫也位淮南太守

案靖世居京口而史仍系之河內山陽例得附載

北魏

張蒲字元則河內修武人本名謨後改爲蒲漢太尉延之後父攀慕容垂御史中丞兵部尙書以清方稱蒲少有父風頗涉文史以端謹見知爲慕容寶陽平河間二郡太守尙書左丞太祖定中山寶之官司敍用者多降品秩旣素聞蒲名仍拜爲尙

修武縣志

卷八

人物志

列傳

七

書左丞天興中以蒲清謹方正遷東部大人後拜大中大夫太宗卽位爲內都大官賜爵泰昌子參決庶獄私謁不行號爲公正太常初丁零翟猛雀驅逼民入白巒山謀爲大逆招蒲與冀州刺史長孫道生等往討道生等欲徑以大兵擊之蒲曰良民所以從猛雀者非樂亂而爲皆逼凶威彊服之耳今若直以大軍臨之吏民雖欲返善其道無由又懼誅夷必竝勢而距官軍然後入山恃阻誑惑愚民其變未易圖也不如先遣使喻之使民不與猛雀同謀者無坐則民必喜而俱降矣道生甚以爲然具以奏聞太宗詔蒲軍前慰喻迺下數千家

還其本屬蒲皆安集之猛雀與親黨百餘人奔逃蒲與道生等追斬猛雀首送京師劉裕寇竊河表以蒲爲南中郎將南蠻校尉隸平南大將軍長孫嵩往禦之裕入長安迺還後改爲壽張子與平安公叔建將兵自平原東渡徇下劉義符青兗諸郡詔加陳兵將軍濟州刺史又與建攻青州不克而還世祖卽位以蒲清貧妻子衣食不給迺出爲相州刺史扶弱抑彊進善黜惡教化大行始光三年卒於州年七十二吏民痛惜之蒲在謀臣之列屢出爲將朝廷清論常爲稱首贈平東將軍廣平公諡曰文恭

修武縣志

卷八

人物志

列傳

六

子昭有志操天興中以功臣子爲太學生太宗卽位爲內主書後襲父爵神廟中從征蠕蠕以功進爵修武侯加平原將軍延和二年出爲幽州刺史開府加寧東將軍時幽州年穀不登州廩虛罄民多菜色昭謂民吏曰何我之不德而遇其時乎迺使富人通濟貧乏車馬之家糴運外境貧弱者勸以農桑歲迺大熟士女稱頌之在任三年卒子昶襲爵早卒

昶弟靈符眞君八年補中書博士和平中咸陽郡民趙昌聚黨作逆百姓騷動詔靈符宣旨慰喻民迺復業天安初遷中書侍郎賜爵昌國子延興中

使南豫州觀察風俗太和四年除建威將軍廣平太守遷爲尚書左丞司州大中正後除鎮遠將軍齊州刺史十六年轉光州刺史加立忠將軍卒

本傳

案十六國春秋後燕錄亦云蒲漢太尉延之後荀靈龜水經注沁水篇水北有華嶽廟碑河內郡功曹山陽荀靈龜以和平四年造天安元年立

唐

韓愈字退之鄧州南陽人七世祖茂有功於後魏封安定王父仲卿爲武昌令有美政旣去縣人刻石頌德終祕書郎愈生三歲而孤隨伯兄會貶官

修武縣志

卷八

人物志

列傳

九

嶺表會卒姦鄭鞠之愈自知讀書日記數千百言比長盡能通六經百家學擢進士第會董晉爲宣武節度使表署觀察推官晉卒愈從喪出不四日汴軍亂迺去依武寧節度使張建封建封辟府推官操行堅正鯁言無所忌諷四門博士遷監察御史上疏極論宮市德宗怒貶陽山令有愛在民民生子多以其姓字之改江陵法曹參軍元和初權知國子博士分司東都三歲爲眞改都官員外郎卽拜河南令遷職方員外郎華陰令柳澗有臯前刺史劾奏之未報而刺史罷澗諷百姓遮索軍頓役直後刺史惡之案其獄貶澗房州司馬愈過華

以爲刺史陰相黨上疏治之旣御史復問得濶贓
再貶封溪尉愈坐是復爲博士旣才高數黜官又
下遷迺作進學解以自諭曰國子先生晨入太學
召諸生立館下誨之日業精於勤荒於嬉行成於
思毀於隨方今聖賢相逢治具畢張拔去兇邪登
崇峻良占小善者率以錄名一藝者無不庸爬羅
剔抉刮垢磨光蓋有幸而獲選孰云多而不揚諸
生業患不能精無患有司之不明行患不能成無
患有司之不公言未旣有笑於列者曰先生欺子
哉弟子事先生於茲有年矣先生口不絕陰於六
藝之文手不停披於百家之編記事者必提其要

修武縣志

卷八

人物志 列傳

三

纂言者必鉤其元貪多務得細大不捐燒膏油以
繼晷常矻矻以窮年先生之業可爲勤矣觝排異
端攘斥佛老補苴罅漏張皇幽渺尋墜緒之茫茫
獨芻按而遠紹障百川而東之回狂瀾於旣倒先
生之於儒可爲勞矣沈浸醲郁含英咀華作爲文
章其書滿架上規姚姒渾渾亾涯周誥商盤佶屈
聱牙春秋謹嚴左氏浮夸易奇而法詩正而葩下
迨莊騷太史所錄子雲相如同工異曲先生之於
文可謂閱其中而肆其外矣少始知學勇於敢爲
長通於方左右具宜先生之於爲人可爲成矣矻
而公不見信於人私不見助於友跋前躓後動輒

得咎暫爲御史遂竄南夷三年博士穴不見治命
與仇謀取敗幾時冬煖而兒號寒年豐而妻號飢
頭童齒豁竟死何裨不知慮此而反教人爲先生
曰吁子來前夫大木爲桀細木爲桷構櫨侏儒椳
闌居楔各得其宜施以成室者匠氏之工也玉札
丹砂赤箭青芝牛溲馬勃敗鼓之皮俱收竝蓄待
用無遺者醫師之良也登明選公雜進巧拙紆餘
爲妍卓犖爲傑校短量長唯器是適者宰相之方
也昔者孟軻好辨孔道以明轍環天下卒老於行
荀卿守正

韓集點勘云守正當作宗王

大論以興逃讒於楚廢

死蘭陵是二儒者吐詞爲經舉足爲法絕類離倫

修武縣志

卷八

人物志 列傳

三

優入聖域其遇於世何如也今先生學雖勤而不
繇其統言雖多而不要其中文雖奇而不濟於用
行雖修而不顯於眾猶且月費奉錢歲靡稟粟于
不知耕婦不知織乘馬從徒安坐而食踵常塗之
促促窺陳編以盜竊然而聖主不加誅宰臣不見
廢茲非其幸歟動而得謫名亦隨之投閒置散迺
分之宜若夫商賄之有無計班養之崇卑念己
量之所稱指前人之瑕疵是所謂詰匠氏之不以
杙爲榼而訾醫師以昌陽引年欲進其豨苓也執
政覽之奇其才改比部郎中史館修撰轉考功知
制誥進中書舍人初憲宗將平蔡命御史中丞裴

度使諸軍案視及還且言賊可滅與宰相議不合
愈亦奏言淮西連年修器械防守金帛糧畜耗於
給賞執兵之卒四向侵掠農夫織婦餉於其後得
不償費比閭畜馬皆上槽櫪此譬有十夫之力自
朝抵夕跳躍叫呼勢不支久必有委頓當其已衰
三尺童子可制其命况以三州殘弊困劇之餘而
當天下全力其敗可立而待也然未可知者在陛
下斷與不斷耳夫兵不多不足以取勝必勝之師
不在速戰兵多而戰不速則所費必廣疆場之上
日相攻劫近賊州縣賦役百端小遇水旱百姓愁
苦方此時人人異議以惑陛下陛下持之不堅半

修武縣志

卷八

人物志 列傳

三

塗而罷傷威損費為弊必深所要先決於心詳度
本末事至不惑迺可圖功又言諸道兵羈旅單弱
不足用而界賊州縣百姓習戰鬪知賊深淺若募
以內軍教不三月一切可用又欲四道置兵道率
三萬畜力伺利一日俱縱則蔡首尾不救可以責
功執政不喜會有人詆愈在江陵時為裴均所厚
均子鏐素無狀愈為文章字命鏐謗語囂暴由是
改太子右庶子及度以宰相節度彰義軍宣慰淮
西奏愈行軍司馬愈請乘遽先入汴說韓宏使中
方元濟平遷刑部侍郎憲宗遣使者往鳳翔迎佛
骨入禁中三日迺送佛祠王公士人奔走膜拜至

爲夷法灼體膚委珍貝騰沓係路愈聞惡之迺上
表曰佛者夷狄之一法耳自後漢時始入中國上
古未嘗有也昔黃帝在位百年年百一十歲少昊
在位八十年年百歲顓頊在位七十九年年九十
歲帝嚳在位七十年年百五歲堯在位九十八年
年百一十八歲帝舜在位及禹年皆百歲此時天
下太平百姓安樂壽考然而中國未有佛也其後
湯亦年百歲湯孫太戊在位七十五年武丁在位
五十九年書史不言其壽推其年數蓋不減百歲
周文王年九十七歲武王年九十三歲穆王在位
百年此時佛法亦未至中國非因事佛而致然也

修武縣志

卷八

人物志 列傳

三

漢明帝時始有佛法明帝在位纔十八年其後亂
亾相繼運祚不長宋齊梁陳元魏以下事佛漸謹
年代尤促唯梁武帝在位四十八年前後三度捨
身施佛宗廟祭不用牲牢晝日一食止於菜果後
爲侯景所逼餓死臺城國亦尋滅事佛求福迺更
得禍由此觀之佛不足信亦可知矣高祖始受隋
禪則議除之當時羣臣識見不遠不能深究先王
之道古今之宜推闡聖明以救斯弊其事遂止臣
常恨焉伏惟睿聖文武皇帝陛下神聖英武數千
百年以來未有倫比卽位之初卽不許度人爲僧
尼道士又不許別立寺觀臣當時以爲高祖之志

必行於陛下今縱未能卽行豈可恣之令盛也今陛下令羣僧迎佛骨於鳳翔御樓以觀昇入大內又令諸寺遞加供養臣雖至愚必知陛下不惑於佛作此崇奉以祈福祥也直以豐年之餘徇人之心爲京都士庶設詭異之觀戲玩之具耳安有聖明若此而肯信此等事哉然百姓愚冥易惑難曉苟見陛下如此將謂真心信佛皆云天子大聖猶一心信向百姓微賤於佛豈合更惜身命以至灼頂燔指十百爲羣解衣散錢自朝至暮轉相倣效唯恐後時老幼奔波棄其生業若不卽加禁遏更歷諸寺必有斷臂鬻身以爲供養者傷風敗俗傳

笑四方非細事也佛本夷狄之人與中國言語不通衣服殊製口不道先王之法言身不服先王之法服不知君臣之義父子之情假如其身尙在奉其國命來朝京師陛下容而接之不過宣政一見禮賓一設賜衣一襲衛而出之於境不令貳於眾也况其身死已久枯朽之骨凶穢之餘豈宜以入宮禁孔子曰敬鬼神而遠之古之諸侯弔於其國必令巫祝先以桃茆祓除不祥然後進弔今無故取朽穢之物親臨觀之巫祝不先桃茆不用羣臣不言其非御史不舉其失臣實恥之乞以此骨付之水火永絕根本斷天下之疑絕前代之惑使天

下之人知大聖人之所作爲出於尋常萬萬也。如有靈能作禍崇，凡有殃咎，宜加臣身上。天鑑臨臣，不怨悔，表入帝，大怒，持示宰相，將抵以死。裴度崔羣曰：愈言抵牾，罪之誠宜，然非內懷至忠，安能及此。願少寬假。以來的諫爭，帝曰：愈言我奉佛太過，猶可容。至謂東漢奉佛以後，天子咸天促言，何乖刺邪。愈人臣狂妄，敢爾固不可赦。於是中外駭懼。雖戚里諸貴亦爲愈言迺貶潮州刺史。既至潮，以表哀謝曰：臣以狂妄，戇愚不識禮度，陳佛骨事，言涉不恭，正名定罪，萬死莫贖。陛下哀臣愚忠，恕臣狂直，謂言雖可罪，心亦無他。特屈刑章，以臣爲潮。

修武縣志

卷八 人物志·列傳

三

州刺史既免刑誅，又獲祿食。聖恩寬大，天地莫量。破腦刳心，豈足爲謝。臣所領州在廣府極東，過海口下惡水，濤瀧壯猛，難計期程。颶風鱷魚禍患，不測。州南近界漲海連天，毒霧瘴氛，日夕發作。臣少多病，年纔五十，髮白齒落，理不久長。加以罪犯至重，所處遠惡，憂惶慙悸，死亾無日。單立一身，朝無親黨，居蠻夷之地，與魑魅同羣。苟非陛下哀而念之，誰肯爲臣言者。臣受性愚陋，人事多所不通，惟酷好學問，文章未嘗一日暫廢。實爲時輩所見推許。臣於當時之文，亦未有過人者。至於論述陛下功德，與詩書相表裏，作爲歌詩薦之郊廟，紀太山。

之封鑲白玉之牒鋪張對天之宏休揚厲無前之
偉蹟編於詩書之策而無愧措於天地之間而無
虧雖使古人復生臣亦未肯多讓伏以皇唐受命
有天下四海之內莫不臣妾南北東西地各萬里
自天寶以後政治少懈文教未優武剋不剛孽臣
姦隸蠱居碁處搖毒自防外順內悖父死子代以
祖以孫如古諸侯自擅其地不朝不貢六七十年
四聖傳序以至陛下陛下即位以來躬親聽斷旋
乾轉坤關機闔開雷厲風飛日月清照天戈所麾
無不從順宜定樂章以告神明東巡泰山奏功皇
天具著顯庸明示得意使永永萬年服我成烈當

修武縣志

卷八

人物志

列傳

三

此之際所謂千載一時不可逢之嘉會而臣負罪
嬰釁自拘海島戚戚嗟嗟日與死迫會不得奏薄
伎於從官之內隸御之間窮思畢精以贖前過懷
痛窮天死不閉目伏惟陛下天地父母哀而憐之
帝得表頗感悔欲復用之持示宰相曰愈前所論
是大愛朕然不當言天子事佛迺年促耳皇甫鎛
素忌愈直卽奏言愈終狂疏可且內移迺改袁州
刺史初愈至潮州問民疾苦皆曰惡溪有鱷魚食
民畜產且盡民是以窮數日愈自往視之令其屬
秦濟以一羊一豚投谿水而祝之曰昔先王既有
天下迺山澤罔繩搗刃以除蟲蛇惡物爲民物害

者驅而出之四海之外及德薄不能遠有則江漢
之間尚皆棄之以與蠻夷楚越况潮嶺海之間去
京師萬里哉鱷魚之涵淹卵育於此亦固其所今
天子嗣唐位神聖慈武四海之外六合之內皆撫
而有之况禹跡所揜揚州之近地刺史縣令之所
治出貢賦以供天地宗廟百神之祀之壞者哉鱷
魚其不可與刺史雜處此土也刺史受天子命守
此土治此民鱷魚睥然不安谿潭據處食民畜熊
豕鹿麋以肥其身以種其子孫與刺史拒爭爲長
雄刺史雖駑弱亦安肯爲鱷魚低首下心仙仙
睨爲吏民羞以偷活於此也且承天子命以來爲
吏固其勢不得不與鱷魚辨鱷魚有知其聽刺史
潮之州大海在其南鯨鵬之大鰕蟹之細無不容
歸以生以食鱷魚朝發而夕至也今與鱷魚約盡
三日其率醜類南徙於海以遵天子之命吏三日
不能至五日五日不能至七日七日不能是終不
肯徙也是不有刺史聽從其言也不然則是鱷魚
冥頑不靈刺史雖有言不聞不知也夫傲天子之
命吏不聽其言不徙以避之與冥頑不靈而爲民
物害者皆可殺刺史則選材技吏民操彊弓毒矢
以與鱷魚從事必盡殺迺止其無悔祝之夕暴風
震電起谿中數日水盡涸西徙六十里自是潮無

鱷魚患袁人以男女爲隸過期不贖則沒入之愈至悉計庸得贖所沒歸之父母七百餘人因與約禁其爲隸召拜國子祭酒轉兵部侍郎鎮州亂殺田宏正而立王廷湊詔愈宣撫旣行眾皆危之元稹言韓愈可惜穆宗亦悔詔愈度事從宜無必入愈至廷湊嚴兵逐之甲士陳廷旣坐廷湊曰所以紛紛者迺此士卒也愈大聲曰天子以公爲有將帥材故賜以節豈意同賊反邪語未終士前奮曰先太師爲國擊朱滔血衣猶在此軍何負迺以爲賊乎愈曰以爲爾不記先太師也若猶記之固善天寶以來安祿山史思明李希烈等有子若孫在

修武縣志

卷八 人物志 列傳

三

乎亦有居官者乎眾曰無愈曰田公以魏博六州歸朝廷官中書令父子受旌節劉悟李佑皆太鎮此爾軍所共聞也眾曰宏正刻故此軍不安愈曰然爾曹亦害田公又殘其家矣復何道眾謹曰善廷湊慮眾變疾麾使去因曰今欲廷湊何所爲愈曰神策六軍將如牛元翼者爲不乏但朝廷顧大體不可棄之公久圍之何也廷湊曰卽出之愈曰若爾則無事矣會元翼亦潰圍出廷湊不追愈歸奏其語帝大悅轉吏部侍郎時宰相李逢吉惡李紳欲逐之遂以愈爲京兆尹兼御史大夫特詔不臺參而除紳中丞紳果劾奏愈愈以詔自解其後

文刺紛然宰相以臺府不協遂罷愈爲兵部侍郎
而出紳江西觀察使紳見帝得畱愈亦復爲吏部
侍郎長慶四年卒年五十七贈禮部尚書諡曰文
愈性明銳不詭隨與人交始終不少變成就後進
士往往知名經愈指授皆稱韓門弟子愈官顯稍
謝遣凡內外親若交友無後者爲嫁遣孤女而卹
其家嫠鄭喪爲服暮以報每言文章自漢司馬相
如太史公劉向揚雄後作者不世出故愈深探本
元卓然樹立成一家言其原道原性師說等數十
篇皆奧衍闔深與孟軻揚雄相表裏而佐佑六經
云至它文造端直辭要爲不襲蹈前人者然惟愈

修武縣志

卷八

人物志 列傳

无

爲之沛然若有餘至其徒李翱李漢皇甫湜從而
效之遂不及遠甚從愈游者若孟郊張籍亦皆有
名於時

贊曰唐興承五代剖分王政不綱文弊質窮蠹僮
混竝天下已定治荒剔蠹討究儒術以典憲薰
醲涵浸殆百餘年其後文章稍稍可述至貞元元
和閒愈遂以六經之文爲諸儒倡障隄末流反刊
以樸剗僞以眞然愈之才自視司馬遷揚雄至班
固以下不論也當其所得粹然一出於正刊落陳
言橫鶩別驅汪洋大肆要之無牴牾聖人者其道
蓋自比孟軻以荀况揚雄爲未醇豈不信然至進

諫陳謀排難卹孤孀拂媮末皇皇於仁義可謂篤道君子矣自晉迄隋老佛顯行聖道不斷如帶諸儒倚天下正議助爲怪神愈獨喟然引聖爭四海之惑雖蒙訕笑哈而復奮始若未之信卒大顯於時昔孟軻拒楊墨去孔子才二百年愈排二家迺去千餘歲撥衰反正功與齊而力倍之所以過况雄爲不少矣自愈沒其言大行學者仰之如泰山

北斗云

新唐書本傳

韓愈字退之昌黎人父仲卿無名位愈生三歲而孤養於從父兄愈自以孤子幼刻苦學儒不俟獎勵大歷貞元之間文字多尙古學效揚雄董仲舒

修武縣志

卷八

人物志

列傳

三

之述作而獨孤及梁肅最稱淵奧儒林推重愈從其徒遊銳意鑽仰欲自振於一代洎舉進士投文於公卿聞故相鄭餘慶頗爲之延譽由是知名於時尋登進士第宰相董晉出鎮大梁辟爲巡官府除徐州張建封又請爲其賓佐愈發言直率無所畏避操行堅正拙於世務調授四門博士監察御史德宗晚年政出多門宰相不專機務官市之弊諫官論之不聽愈嘗上章數千言極論之不聽怒貶爲連州陽山令量移江陵府掾曹元和初召爲國子博士遷都官員外郎時華州刺史閻濟美以公事停華陰令柳澗縣務俾攝掾曹居數月濟美

罷郡出居公館澗遂諷百姓遮道索前年軍頓役
直後刺史趙昌案得澗罪以問貶房州司馬愈因
使過華知其事以爲刺史相黨上疏理澗留中不
下詔監察御史李宗奭案驗得澗贓狀再貶澗封
溪尉以愈妄論復爲國子博士愈自以才高累被
擯黜作進學解以自喻全文已見新唐書茲不具載執政覽其
文而憐之以其有史才改比部郎中史館修撰踰
歲轉考功郎中知制誥拜中書舍人俄有不悅愈
者撫其舊事言愈前左降爲江陵掾曹荆南節度
使裴均館之頗厚均子鏐凡鄙近者鏐還省父愈
爲序餞鏐仍呼其字此論宣於朝列坐是改太子

修武縣志

卷八

人物志

列傳

三

右庶子元和十二年八月宰臣裴度爲淮西宣慰
處置使兼彰義軍節度使請愈爲行軍司馬仍賜
金紫淮蔡平十二月隨度還朝以功授刑部侍郎
仍詔愈譔平淮西碑其辭多敍裴度事時先入蔡
州擒吳元濟李愬功第一愬不平之愬妻出入禁
中因訴碑辭不實詔令磨愈文憲宗命翰林學士
段文昌重譔文勒石鳳翔法門寺有護國眞身塔
塔內有釋迦文佛指骨一節其書本傳法三十年
一開開則歲豐人泰十四年正月上令中使杜英
奇押宮人三十人持香花赴臨臯驛迎佛骨圍光
順門入大內畱禁中三日迺送諸寺王公士庶奔

走捨施唯恐在後百姓有廢業破產燒頂灼臂而求供養者愈素不喜佛上疏諫全文見新書本傳疏奏憲宗怒甚閒一日出疏以示宰臣將加極法裴度崔羣奏曰韓愈上忤尊聽誠宜得罪然而非內懷忠懇不避黜責豈能至此伏乞稍賜寬容以來諫者上曰愈言我奉佛太過我猶爲容之至謂東漢奉佛之後帝王咸致天促何言之乖刺也愈爲人臣敢爾狂妄固不可赦於是人情驚惋迺至國戚諸貴亦以罪愈太重因事言之迺貶爲潮州刺史愈至潮陽上表全文見新書本傳憲宗謂宰臣曰昨得韓愈到潮州表因思其所諫佛骨事大是愛我我豈不

修武縣志

卷八

人物志 列傳

三

知然愈爲人臣不當言人主事佛迺年促也我以是惡其容易上欲復用愈故先語及觀宰臣之奏對而皇甫鎛惡愈狷直恐其復用率先對曰愈終大狂疏且可量移一郡迺授袁州刺史初愈至潮陽旣視事詢吏民疾苦皆曰郡西湫水有鱷魚卵而化長數丈食民畜產將盡以是民貧居數日往視之令判官秦濟炮一豚一羊投於湫水呪之全文見新書本傳呪之夕有暴風雷起於湫水數日湫水盡涸徙於舊湫西六十里自是潮人無鱷患袁州之俗男女隸於人者踰約則沒入出錢之家愈至設法贖其所沒男女歸其父母仍削其俗法不許隸

人十五年徵爲國子祭酒轉兵部侍郎會鎮州殺
田宏正立王廷湊令愈往鎮州宣諭愈旣至集軍
民諭以逆順辭情切至廷湊畏重之改吏部侍郎
轉京兆尹兼御史大夫以不臺參爲御史中丞李
紳所劾愈不伏言準勅仍不臺參紳愈性皆褊僻
移刺往來紛然不止迺出紳爲浙西觀察使愈亦
罷尹爲兵部侍郎及紳面辭赴鎮泣涕陳敘穆宗
憐之迺追制以紳爲兵部侍郎愈復爲吏部侍郎
長慶四年十二月卒時年五十七贈禮部尙書諡
曰文愈性宏通與人交榮悴不易少時與洛陽人
孟郊東郡人張籍友善二人名位未振愈不避寒

修武縣志

卷八

人物志

列傳

三

暑稱薦於公卿閒而籍終成科第榮於祿仕後雖
通貴每退公之隙則相與談讌論文賦詩如平昔
焉而觀諸權門豪士如僕隸焉瞭然不顧而頗能
誘厲後進館之者十六七雖晨炊不給怡然不介
意大抵以興起名教宏獎仁義爲事凡嫁內外及
友朋孤女僅十人常以爲自魏晉已還爲文者多
拘偶對而經誥之指歸遷雄之氣格不復振起矣
故愈所謂文務反近體抒意立言自成一家新語
後學之士取爲師法當時作者甚眾無以過之故
世稱韓文焉然時有恃才肆意亦有鑿孔子孟之旨
若南人妄以柳宗元爲羅池神而愈譏碑以實之

李賀父名晉不應進士而愈為賀作諱辨令舉進士又為毛穎傳譏戲不近人情此文章之甚紕繆者時謂愈有史筆及讓順宗實錄繁簡不當敘事拙於取捨頗為當代所非穆宗文宗嘗詔史臣叅改時愈壻李漢蔣係在顯位諸公難之而韋處厚竟別讓順宗實錄三卷有文集四十卷李漢為之序子昶亦登進士第舊唐書本傳

韓雲卿禮部郎中

李白武昌令去思頌作監察御史

當大歷世文

詞獨行中朝姪愈及李翱皆推重之

舊志文苑宰相世系表

作禮部侍郎

韓紳卿愈之叔父涇陽令

李白武昌令去思頌作高郵尉

嘗為揚

修武縣志

卷八

人物志 列傳

十四

州錄事參軍工古文而能官

宰相世系表作京兆府司錄參軍

韓少卿愈之叔父官當塗丞慷慨重然諾死於節

義

宰相世系表有升卿官易州司法參軍無少卿

韓會仲卿子愈之伯兄第進士善清言有文章名

最高時號為四夔之一官至起居郎中書舍人

舊志

文苑表作起居舍人

宰相世系表

韓弇雲卿子進士及第朔方節度請掌書記授祕

書省校書郎累遷殿中侍御史貞元三年吐番乞

盟詔即塞上與之盟其五月吐番不肯盟弇遇害

李觀有弔韓君沒番中文

宰相世系表有愈開封令無弇

韓昶字有之愈之子好文字出言成章為文學樊

宗師二十五及第試宏文館校書郎襄州從事高陵尉集賢殿校理遷度支監察拜拾遺好直言一日上疏或過二三牛僧儒鎮襄陽以殿中加度支使旋拜祕書省著作郎遷國子博士除別駕檢校

禮部郎中

舊志文苑

韓湘字北渚愈兄介之孫姪老成之子長慶三年

進士官大理丞

舊志方伎

案孟縣韓氏於乾隆元年奉部核準蒙

恩世襲五經博士

衛審符懷州判范遵衛刺史神道碑曰噫生也有

修武縣志

卷八

人物志

列傳

三五

涯蒙叟陳其至理逝者弗返孔聖歎於川流其或身沒名存源疏派遠將垂之榮袞必敍之以貞珉今昔倏同賢哲斯尙公名審符字表節懷州修武人也曾祖祖先考銀青光祿大夫檢校工部尙書陳州別駕兼御史大夫上柱國宏參國事始封鄘邶因而氏焉公幼而倜儻長而英異志抱忠貞之操家傳禮讓之風筮仕之初方屬變亂素便弓馬兼蘊機鈴歷職戎門總權邊戍初授澤州軍州事天復元年授懷州刺史是時兵火之後郡邑凋傷公下車期年風俗丕變葺完公署招復流亾政績屢彰歌頌盈耳天祐三年加金紫光祿大夫檢校

司空守唐州刺史兼御史大夫上柱國開國男食
邑三百戶賜紫金魚袋又移耶城於沁水導商販
於荆蠻威惠兼行道塗通濟復領眾職亟臨舊封
疊膺衣錦之榮益著無窮之詠又授蔡州刺史所
在皆有政能庶民歌詠及去郡薨享年五十四寓
殯於河南以同光二年十一月八日歸葬於修武
縣清平鄉南孔莊之別業公虛襟接物寬政臨人
累縮兵權五分郡印遠近咸臻於義路議獄不昧
於情由惜其梁木易摧卿雲難駐不臻遐壽夫何
道哉夫人安定縣君安氏德順母儀肅和人表奉
粢盛而有譽嚴慈訓以無虧長子紹鈐義成軍節

修武縣志

卷八 人物志 列傳

三

度押衙濮州馬步軍虞候銀青光祿大夫檢校右
散騎常侍御史大夫上柱國次子崇允河陽節度
使押衙懷州團練使銀青光祿大夫檢校左散騎
常侍御史大夫上柱國竝生知禮樂動合規模俱
揚孝弟之風各凜過庭之誠有叔四人勤於農業
皆有令名播於鄉曲公養叔恆加禮敬焉弟崇建
河陽節度同押衙銀青光祿大夫檢校國子祭酒
御史大夫上柱國甚敦友愛悲夫甯邑古郊行山
積翠清源甚吉濟瀆資深爰卜高原永安元寢昭
燕之慶期於無窮夫人洎子俱勉爲焉飛陵遷谷
變銜哀怨故述銘云維嵩誕粹大昴垂芒爰生雄

傑乃觀鷹揚權師挾忠盡節勤王恩霑疲瘵繼龔
龔黃茂績常存徽音不已方躡亨衢忽驚逝水懷
義歸仁歌途詠里懿德清廉遺芳可紀母崇慈訓
克慎終始箕裘不墜棣萼增華情陳哀感血泣衰
麻獨遺威愛以慰幽遐鬱鬱佳城蕭蕭古木地吉
坦平山遠朝伏積德累仁垂休嗣續宥可十世俾
振家風刻銘紀德以傳無窮

會祖祖先考
句有脫文

宋

蘇立司馬溫公蘇旗驥墓碣銘曰蘇氏之先出自
重黎忿生爲周武王司寇封於溫邑爲卿士或謂
之溫子春秋時爲狄所滅子孫以邑爲氏歷世久

修武縣志

卷八

人物志

列傳

三

遠散之四方在洛陽者秦厲代以口辨顯戰國世
在杜陵者建爲漢名將子武使匈奴中十九年不
屈節在武功者綽仕宇文周以明法令爲某官子
威隋文帝佐命功臣至唐壞父子爲賢相此其章
章尤著者也周衰溫爲晉邑漢屬河內郡隋以河
內爲懷州惟修武之族不棄其故土雷懷州不去
公其後焉公諱立字挺之曾大父諫大父遠皆不
仕父璉贈左司禦率妣段氏封永寧縣太君公幼
慷慨有遠志自力讀書不治家事宗族爭笑且怒
之曰汝世農家勤治耕桑以豐衣食汝忽棄業爲
書生窮餒無日矣公會不顧爲學益堅早喪二親

哀毀過禮鄉曲稱之弱冠舉三傳科景德中契丹南侵河北盜賊蠡起公於是盡散家財糾合鄉曲子弟結以信義扞禦羣寇修武由是獲全大將軍某北征公踵軍門上謁延入與語兵事大悅卽奏偕行至中山會契丹圍城甚急用公之策卒拒卻之於是天子曰契丹犯塞河北士子躬被甲胄扞敵有功今天下貢舉已畢朕憐夫北方賢士大夫不得以時充貢其皆召試賜第公由是解褐補符離尉縣多寇盜吏卒單弱公弊訓率厲擒馘七十餘人闔境清肅改河清主簿考滿吏民羣詣轉運使所請留詔聽更畱戒資而去遷遂州錄事參軍

本道掄薦召對擢爲大理寺丞知大名縣事尋除通判州事入朝遷太子中舍國家沿前世故事分文武百官爲二塗其遷次任使皆不相參涉有相移易者聽之以公素善武事加習邊務遂改供備庫副使知威勝軍事繼典嵐莫石鳳夔五州皆著聲績官歷東染院洛苑一副使其在夔州兼夔梓兩路兵馬都監提舉諸州巡檢兵甲賊盜事久之上表乞朝因言邊防民政諸利害稱上旨遷右驎副使同提點湖南兩浙刑獄公事年七十四以慶歷二年十月十二日終於長沙官舍公始雖以學術爲文吏而性好勇有智略晚年夏寇苦邊諸

將多敗北無功公聞之歎曰吾以布衣起家至方伯承兩朝恩渥不可勝紀家近趙魏麤習兵略今狂虜驕嫚侵擾疆場而吾老病不得荷戈前驅以報萬一非命也夫然卒不得盡其志嗚呼哀哉夫

人張氏先公卽世子四人師古梁州團練判官師顏衛州司法參軍夢臣獲嘉縣主簿季子師路及孫孝先曾孫叔元皆三班借職餘孫九人幼未官公之在荆湖也夢臣爲三班奉職以公高年多疾求告省侍朝廷以武吏求省侍無故事不許卽乞改文職歸省方許之行及宛葉閒喪因號泣晝夜奔赴凡七日行千三百里近世宦遠方而死者

子孫多焚其柩以燼歸葬相習爲常無譏誚者夢臣獨奮然曰爲人子孫忍行此豈人心也哉自長沙數千里奉柩以歸嗚呼其信知義而斷不與流俗者夫古人稱善人者其身不耀必在子孫豈信然邪慶歷四年十一月十五日葬於七賢鄉溫泉里先府君之兆夫人張氏耐光鄉邑於公近又久承公之知故其於公之始終治行也於他人爲悉其諸子以碣文爲請光何敢辭謹銘曰武以遏亂文以制治要在安人皆男子事武威文法公實兼之盜銷吏暇良愿帥師作牧大州人臣美仕起家布衣非贊孰致政優譽洽榮哀始終昭明壘隧垂

著無窮

案此文載公集中舊志又收太常博士口琳所撰神道碑與此僅增損百餘字想係公作墓誌琳卽據之以爲神道碑也故捨彼錄此

金

呂豫金元好問諱南峯先生墓表曰先生諱豫字彥先姓呂氏懷州修武人祖道父琰皆力田爲業先生自成童知讀書既冠游學東州以易爲專門經明行修高出倫輩醇德先生王廣道特器重焉一時名士如秀容折安上濟陽王善長安陽苗景藩館陶段彥昌寇氏孫希賢田子發從之學者甚

修武縣志

卷八

人物志

列傳

四

眾故家近太行五峯因以爲號示不忘本也有易說若干卷傳於時宗室復興鎮大名聞先生之名延致門下以師禮禮之初娶館陶汲氏繼室清平丁氏先生往來兩縣之間爲人廉介沈默爲里人所尊貞祐之兵謂所親言吾年八十有四天數當盡癸酉唯有坐待歸盡而已是冬所在殘破吾民老幼相與逃亾先生喟然歎曰癸酉之期至矣明日有乘白馬衣皂衣挾弓矢馳逐於社原桑林之下者吾死此人手矣詰旦果有邏騎到物色悉如所言先生欣然就戮實十二月之二十三日也兵退孤子天民收葬於館陶大張里之東原王子之

冬距先生之歿四十年矣天民與好問有通家之好以墓表見屬余亦懼先生之潛德將隨世而磨滅也迺爲之銘天民嘗任寇氏主簿孫二人長曰長慶次日公孫銘曰被髮衝刀禍孰與遷彈琴視景命何可延誠使之禽息烏視而終白首固已無貴於期頤之年老聃元虛莊周氏之自然死以爲眞兀以爲全寔薪火之可續直土梗之自捐若夫鴻毛權重輕所宜熊掌定從違之先有巖牆之疾趨有白刃之徑前唯其知命而安於命此深於易者之所以賢

元

修武縣志

卷八

人物志

列傳

聖

孫善眞修武人癸酉元師略河閒善眞以所保柵附大城以降得賜官修武校尉佩銀符後以功遷忠翊金匱始罷諸鎮兵令各封賞有功者遂署本

縣尉

見元劉因靜修集武彊尉孫君墓銘

李天佑字君佐世居修武田門里年十歲河北兵亂僑居冀州始以軍功官百戶世祖至元初從襄陽率千餘人登艦橫出江口宋人聯船以待天佑用長矛斷其纜力戰破之遷武略將軍荆湖北道屯田總管募民能田者躬督之善水利歲益稔年

七十一卒於官

節錄墓志詳見陵墓

遂魯會字善止修武人性剛介通經術中天歷二

年進士第授翰林國史院編修官辟御史臺掾掌
機密監察御史劾中丞史顯夫簡傲魯曾開實封
於大夫前曰中丞素持重不能與人周旋御史以
人情劾之非公論由是皆知其直除太常博士武
宗一廟未立后主配享集羣臣廷議之魯曾抗言
先朝以武宗皇后眞哥無子不立其主時伯顏爲
右丞相以爲明宗之母亦乞列氏可以配享徽政
院傳太后旨以文宗之母唐兀氏可以配享伯顏
問魯曾曰先朝旣以眞哥皇后無子不立爲主今
所立者明宗母乎文宗母乎對曰眞哥皇后在武
宗朝已膺玉冊則爲武宗皇后明宗文宗二母后

固爲妾也今以無子之故不立爲主以妾后爲正
宮是爲臣而廢先君之后爲子而追封先父之妾
於禮不可且燕王垂卽位追廢其母后而立其先
母爲后以配享先王爲萬世笑豈可復蹈其失乎
集賢大學士陳顥素嫉魯曾出曰唐太宗冊曹王
明之母爲后是亦二后也豈不可乎魯曾曰堯之
母爲帝嚳庶妃堯立爲帝未閱冊以爲后而配嚳
皇上爲大元天子不法堯舜而法唐太宗邪眾服
其議而伯顏聽之遂以眞哥皇后配焉復拜監察
御史劾答失海牙阿吉刺太尉鞏卜班右丞兀突
蠻刑部尙書吉當普監察御史哈刺完者月魯不

花院使呂思誠郎中皆黜之八人之中惟思誠少過亦變祖宗選法餘皆伯顏之黨朝廷肅然除樞密院都事上言前伯顏專殺大臣其黨利其妻女巧誣以罪今大小官及諸人有罪止坐其身不得籍其妻女郊王爲伯顏構陷妻女流離當雪其無辜給復子孫從之除刑部員外郎悉辨正橫羅伯顏所誣者遷宗正府郎中出爲遼陽行省左右司郎中除僉山北道肅政廉訪司事入爲禮部郎中至正十二年丞相脫脫討徐州賊以官軍不習水土募瀕海鹽丁爲軍乃超遷魯會資善大夫淮南宣慰使領征討事遣其募鹽丁五千人從征徐州

修武縣志

卷八

人物志

列傳

三

平繼使領所部軍討淮東卒於軍

本傳

薛澍字時卿修武人博極羣書宗主孔孟以進士授承務郎主事歷陞樞密都轉運使吏部尙書父祖俱封河東郡侯子秉貞知興州兼知經筵事次

子秉庸濟南司獄

舊志墓碑見金石

陳安元張養浩撰陳公神道碑云公陳氏諱安字良佐世居覃懷修武之六真鄉祖銑金河南宜陽尹考慶屬金訖錄闕德田里公幼而穎異彊記有遠識器度廓如與人交情意周洽有不逮則誠格忠告善則嘖嘖又惟恐其不章讀書主踐履不以口勝人橫逆之來益務自修省雖重亦不復識者

謂有犯而不校撓之不濁之風子惟德蚤仕於外每歸省以安義命毋躁進取譏時賢獲罪公論爲戒嘗爲汴梁酒稅副使初命下人多意其不屑公曰仕患不忠卑下非所患聖人猶爲委吏我何人哉未幾改進義副尉河間鹽司厚財場管勾絜已率下賦報無所隱民甚譽焉俄以年及歸鄉里時惟德爲尙書省檢校官階奉議大夫國制諸封贈公父與子同子陞亦陞遂封奉議大夫驍騎尉河內縣子後惟德進中順大夫戶部員外郎遂加今封享年八十有二卒在延祐四年夏四月某甲葬某所之先塋妻薛氏協德宜家先公如千年卒以

修武縣志

卷八 人物志

列傳

四

明年四月祔公之兆追封潁川郡君曾祖妣趙氏晚嬰風疾數年不能差郡君侍湯液惟謹每教諸子以濟人惠物爲心五子惟德其長次惟善次惟恭次惟剛次惟謙皆仕唯惟德最顯由丞相掾轉祕書著作郎中書架閣管勾尙書省檢校官出爲陝西省左右司員外郎拜監察御史初拜御史多所建白未及行而潁川郡訃至越明年夏五月走書友人張養浩曰孤惟德罪大家君捐館時縻身於官其夔斂祖奠皆弗之及重惟先君平日位不滿德而惟德又歛仕弗克盡養苟沒焉不爲表其素行金石則惟德殆不能人天地間矣敢百拜以

神道碑銘累子肇余友御史君垂三十年爲故人
早歲俱聯掾禮部爲同仕交舊如是而走也尙敢
以不文辭哉惟德字子新方器用於時銘曰太阿
龍泉不必巨戡始知其銛所以古賢草澤或淹爲
國具瞻猗歟潁川諮諮其巖肫肫其謙或有忿然
我海斯涵終鮮悔嫌得厥善焉口不忍拊必播眾
談教子義先已分永甘毋人之貪云胡不懽卑處
閭閻職彼米鹽才苟俱全位雖勿厭奚害爲恬微
子朝聯鴻恩用覃疇發其潛仕甫及年遽爾言南
何守之廉清白世傳壽且多男天報至誠彼道義
捐而致炎炎榮不蓋榭樹石於阡有徵其凡駟茲

修武縣志

卷八

人物志 列傳

巖巖

巖巖

案舊志府志作河陽人皆誤

明

朱興小字黑兒廬州府合肥人父伴哥元順帝至
正十六年於揚州歸附劉公戲下撥太原前衛洪
武五年從征和林歷調大同蔚州十六年卒以興
補役二十年征金山一迷河二十一年征捕魚兒
海子哈刺哈二十二年征迤都山二十三年征洮
兒河皆從軍建文二年歸成祖授小旗隨靖難兵
圍大同白溝河戰勝五月圍濟南授本所總旗十
月克滄州又東昌大戰明年正月威縣深州獲賊

眞定截路兵馬又夾河藁城皆戰勝就攻順德克
西水砦授本所副千戶四年正月克東阿東平汶
上又泚河戰勝又大店小河汴河隄靈璧縣皆全
勝五月過淮六月渡江攻克金川門遷永平衛指
揮僉事永樂二年與流官八年親征漠北五月於
元冥河追蒙古本雅失里六月攻靜虜鎮又廣漢
戍敗蒙古太保阿魯台有功凱旋授本衛指揮同
知明年授流官洪熙元年調懷慶衛宣德六年以
老告退封懷遠將軍子世襲孫良嗣
據正統四年授朱良懷遠
將軍本衛世襲
指揮同知制修

案修武東北七里朱家營本懷慶衛地蓋自興調

修武縣志

卷八

人物志 列傳

壘

懷慶衛予以世襲子孫遂占籍於此也今朱氏家
止統制書猶存

劉幹字孟貞修武人洪武癸酉舉於鄉爲長洲縣
丞清廉仁恕民信愛之比卒貧不能歸民爲買舟
資送留衣冠葬於虎邱山側立石表其上曰劉公

墩

見焦氏
徵獻錄

王鐸字雪屋修武人洪武丙子孝廉累官金華知
府釐姦剔弊如神百姓繪圖祀之子愈懋

舊志

王愈字希賢鐸三子永樂戊戌進士爲侍御史剛
直不遊權貴劾總戎冒功受爵忤旨死

王懋修武人永樂末進士爲海豐知縣後起權西

安知府亦有聲

明史楊瓚傳

附祀鄉賢

舊志詳墓表見陵墓

王璠懋之子天順庚辰進士除刑部郎中擢安慶

府知府布衣疏食不減寒素及歸田閉戶教授所

造就者甚眾當事力薦不起黎陽威靈伯王越曾

執經門下

詳墓表見陵墓

姜郁字宗武天順壬午舉於鄉任撫寧知縣陞蔚

州知州所至著賢聲致仕祀鄉賢

舊志詳墓表見陵墓

張圯字士玉生而仁厚容辭過人苦志嗜學淹貫

經史登景泰庚辰進士官戶部員外郎清修苦節

卒官

節錄墓誌詳見陵墓

韓儼字敬夫修武人仕徽之婺源令縣多大族儼

修武縣志

卷八

人物志

列傳

一

一以齊民視之有事到官以是非曲直斷之民服

其公正

節錄墓誌詳見陵墓

周佑字助也自幼刻苦為文名譽籍甚擢萬歷戊

戌進士出宰山西孝義縣時開府與佑有夙憾遂

投劾歸里居益邃於學四方以文請者踵相錯所

著有懶寄亭平雲山房等集行世

舊志

王玉鉉字太阿修武人少嗜學文譽籍甚萬歷丙

午鄉試第一為文高古雅健有信陽北地之風著

有清水篇數卷

舊志

范繼仁字助寰以明經授九江府通判輦米菽數

百石之官自給攝德化瑞昌星子三邑篆以廉能

稱歸里立義田義學睦其族黨順治十六年祀鄉賢

詹起元字玉峯由明經考授州判不樂仕進閉戶教授足跡不至公庭

馮杞字禎明由明經任嶺縣令多惠政祀鄉賢

張三就號竹林孝友博學中崇禎辛未進士初任朝城多惠政報最調聊城攝濮州范縣各建祠祀擢兵部主事著琅玕館集讞牘焚餘政畧諸書十

卷行世

遂杲字光古修武人貫通經史隱居不仕有清華等集行世舊志

修武縣志

卷八

人物志

列傳

三

王賓王字太之修武人中崇禎己卯副榜所著有

浮園等集

舊志選舉失載今據文苑補入

國朝

姜參龍字雲從鄆五世孫兄躍龍善屬文順治辛卯貢生參龍從之學順治戊子舉於鄉除山東泗水知縣多惠政陞雲南路南州知州病歸卒泗人相率來哭之不忍去舊志

成觀光字賓王少孤事母以孝聞順治丙戌進士

除清源知縣以屢拒劇賊擢刑部主事家居尤勇

於義康熙二年入祀鄉賢

舊志餘詳墓銘見陵墓

范正脈字介子繼仁仲子童時即工詩著卯草為

王中丞漢所重長不盈五尺雙眸炯然順治己丑擢進士選庶吉士授檢討以傲岸改戶部主事出爲長蘆運同遷兩浙鹽運使未任卒正脈嗜學遇異書必手自鈔讀喜結交知名士視世俗蔑如也所著有犖觀堂五雲館涼駕集讀騷齋煙雲過眼亭諸刻行世祀鄉賢

趙旭字用九康熙丙辰進士授直隸蠡縣知縣清廉方正擢御史生平周恤鄰黨排解急難人多德之卒祀鄉賢

舊志

知縣邊懋讓侍御趙公傳略曰康熙癸酉歲余探竹得修武令謁侍御趙公於京邸舉止蘊籍纒踰

修武縣志

卷八

人物志

列傳

哭

年公以病卒於官又六載修武人士臚列公行實求祀鄉賢上聞得可余因內擢將去山陽爰爲之傳曰公諱旭字用九懷之修武人也上世居燕薊聞徙家修武則自德曜公始再傳而生檢討公銳孝廉公欽欽生孝廉公濶銳之後越四世而生處士公俊俊生明經公維宗是爲公父公三歲而孤幼卽自力於學十八補博士弟子員屢試輒高等己酉舉中州義經第一丙辰成進士旣掇巍科務爲閱覽博物尤畱意於古循吏諸政績丙寅謁選除保定蠡吾縣知縣蠡吾在

蠡吾下旗民錯處俗尙勁悍其難治如西漢之有馮

翊扶風也公溫良有讓足智善御眾元元懷愛依
之如慈母焉知蠡民困於旗租多方爲之請命每
歲減七千餘金青衿李素華闖家陷旗鄉民杜氏
兄弟爲姦人計誘入旗公皆捐俸贖之他如修文
廟建樓櫓重農桑興學校制豪彊均徭役當是時
大中丞于公鎮撫京畿一時下吏鮮當意者獨推
獎公不去口每遇盤錯輒謂非趙蠡吾不能辦也
會

皇上發帑金給口北被荒諸處于撫軍卽委公賑保安
衛身歷一百五十邨落人人沾洽故是歲保安民
饑而無害其明年復委公賑安州勤勞一如保安

修武縣志

卷八

人物志

列傳

巽

且代決大獄有神君之稱適清苑乏令長卽命公
視清苑事時霖雨傷稼米價騰踊公請於于撫軍
借庫錢一千七百餘緡糴天津米減價以糴比新
令至計折錢四百緡人或爲公捥腕公笑曰吾但
媿不能如富韓公之治青州耳果能有濟窮黎何
沾沾惜此身外長物邪久之以郭撫軍薦擢廣西
道監察御史巡視東城鯁直著節退食時杜門謝
客日究心於大學衍義文獻通考諸書凡天下大
計古今治亂之原燎然若指諸掌嘗慨然於折漕
糧裁冗兵二事方欲繕疏入告旋遭疾卒卒之日
知與不知莫不惜之論曰余讀兩漢循吏傳未嘗

不廢書而歎曰何古今人不相若歟抑世有其人名湮沒而不彰歟及觀蠡邑初試錄勞心懋績班班可攷昔衛颯治桂陽修武至今世祀若侍御公者非所謂竝美前賢者邪

趙敏字健行旭之子生而穎異以貢授羅山訓導教詢不倦捐置學田膳諸生之秀傑者後補桐柏學引年歸有別墅在寨邨蒔花植木以詩酒自娛年八十餘卒

府志

路永齡字彭年坦然子性孝友登康熙乙卯科賢書仕順天永清縣知縣多惠政邑有女巫肆行蠱惑捕治之一邑震悚年七十有二卒

詳墓表
見陵墓

修武縣志

卷八 人物志 列傳

李

范琬字璋八以康熙戊寅選貢授汝州郟縣教職有劉斯和者家貧琬愛其才令就學署中且時周其家劉後登進士選庶常人皆服其藻鑑與兄珥友愛白首無間

舊志

王夢賚字相樞康熙甲午舉人後中明通榜補項城教職謁選授高臺知縣調婺川民懣俗悍素稱難治夢賚彊幹有吏才莅任五載以治稱

舊志

郟建元字長萬初元父臨終遺命曰家貧非病惟不讀書乃真病耳元因奮志讀書母教甚嚴元承順維謹中康熙癸巳舉人以未竟先志爲憾性剛直遇公義所激常奮不顧身邑人咸信服焉

舊志

范楷字端直號行巖幼篤志於學朝夕忘倦康熙
壬午登賢書雍正庚戌除瀘州同知州屬有瀘渝
地山路險要往來甚艱楷出積俸命工鑿石開道
約百餘丈至今土人稱之爲范公路未期年卒於
官扶柩歸里士民灑淚而送者數千人

舊志

吳周聚字十友性嗜學家雖貧攻苦不輟雍正癸
巳申副榜甲辰登順天賢書生平非孔曾思孟之
書不敢讀非周程張朱之言不敢道訓誨生徒必
以端品立志爲要更樂於獎就人善著論十數篇
皆以正人心扶世道爲己任年老潛玩周易有集
諸說錄性孝友事父母色養備至敬兄弟友于情

修武縣志

卷八

人物志 列傳

五

深父母歿喪葬之禮悉準古道不作鼓樂不筵賓
客一以哀痛迫切爲主年至八十二而終

舊志

賈元鼇字殿先幼而聰慧過目成誦家貧無書遊
歷四方借人書披閱一過終身不忘登乾隆乙丑
進士除汝寧府教授整飭學官訓迪士子士爭自
奮勵以疾卒於任

舊志

李夢松字蔭岐由貢生任桐柏訓導性孝友博聞
廣記尤愛詩歌所著有新增等韻初學訓蒙草訂

正喪禮儀節韻學指掌圖諸書皆足爲後學法

舊志

范令譽字公永幼嗜學博極羣書中康熙己丑進
士選庶吉士工於制藝爲士林冠冕

舊志

薛大範字洪九力貧養親暇則勤學以明經官中
牟訓導學官傾圮倡率紳士修葺之並葺迴車廟
河決楊橋田多沙屢勸邑宰詳豁牟民德之年八

十六卒

府志

趙三元字海峯乾隆甲辰進士授戶部主事擢郎
中用心平恕以京察分發福建署建寧府事發姦
摘伏郡民大服旋補糧道卹水災清社穀渡臺清
釐洋匪積案四攝臬篆善政尤多改廣西左江道
攝藩篆擢廣東鹽運使會辦洋匪朱漢投誠各案
寬嚴得中年六十八卒官

詳見陵墓

金峩字長山歲貢生性剛直見人有非禮者必面

修武縣志

卷八

人物志

列傳

三

叱之精易理著周易圖說闡先後天之數發前人
所未發第峩字全山副貢生性溫和不彊人以難
能不忍人之不能邑中後學成就最多

采訪周易圖說見藝

文志

常公著字元章張弓鋪人嘉慶戊午舉人嘗於縣
北東水寨之東買水田數十畝結廬其中躬帥僮
僕引水插秧當秋夏之交涼宵露坐荷風送韻螢
火交飛蛙聲四起公著於其閒時爲集句詩以自

消遣蓋悠然也

采訪

薛琳字崑璧延陵邨人嘉慶五年恩貢生宅心溫
厚而最持品概薛氏爲修武著姓人丁不下千百

戶以質行推為族長者二十年邑俗多仿周禮族葬之法琳以祖塋不足以容迺糾合族眾出資廣開兆域俾死者咸有所歸友人孫培元以暴病卒試院迺挺身任其責親為送喪歸里生平義行多類此第其品誼不愧一鄉祭酒焉子凌雲歲貢生亦有志行

采訪

趙良遇字際隆榆邨人舌耕養母由歲貢生授太康訓導半載即解組歸每與父老話古今成敗事環聽者滿前著詩橐若干卷子鶴齡

采訪

趙鶴齡字羽仙道光壬午舉人除羅山教諭未任卒負性孤介絕跡公門同里因事興訟羣丐公為

修武縣志

卷八

人物志

列傳

三

緩頰堅執不可無知之徒至毀其廬舍以激之卒不為動然因是益不諧於俗中年以後生計大絀時形窘迫迺未沾寸祿即辭世人稱廣文為冷官竟竝此一片寒氈擁之為餬口之資亦不可得可慨也著說易徵事編每卦爻各引古人事證明之而不不知李莊簡之詳說楊誠齋之易傳已先為之蓋伏處鄉曲未獲見前輩說經遺書故不免蹈古人窠臼然獨抒心得於經義多所發明其精核者不可沒也

采訪

忠節

明

李奎官至副將萬曆十八年大落赤犯邊被傷死

宋訪

侯來同號塗山為韓藩樂平教授弟來庭浙川教諭明崇禎五年流寇破修武城大肆殺掠時來同致仕歸里賊欲屈之來同叱曰吾世受國恩豈從汝作賊邪大罵不止遂遇害

宋訪

案崇禎五年流賊豹五等陷修武鄉官教授侯來同教諭李時華同時殉難紳士七十餘人俱死右見改驛奏疏及綏寇紀略但紀略作侯來問誤王士儁字重吾弟士奇字昇寰皆增廣生崇禎壬申秋九月延安賊魁豹五等陷修武殺官民劫庫

修武縣志

卷八

人物志

忠節

三

獄二子痛入骨髓以身犯難不屈而死

薛雲滋字牛飲峭性淵衷纒冠質樸與游者不知

為近今人崇禎壬申沒於寇

見范介子龍圖詩集

李三樂世居北霍邨崇禎五年山西賊豹五等陷修武三樂子邑庠生詹魁負三樂詹魁妻于氏負其姑逃孟津賊走復歸及明鼎革三樂年已七十五聞變投井死

宋訪

國朝

李之渙庠生尚氣節時太行山多盜渙部勒邑子弟保護鄉里羣盜相戒勿犯他日獨出為賊所害

舊志

孝友

後漢

張奉河內修武人有孝行子表字公儀遭奉喪後

每彈琴慟悽不能成聲

見太平寰宇記次於丁蘭之後惜其朝代無攷姑附

此於

後魏

門文愛汲郡山陽人也早孤供養伯父母以孝謹

聞伯父亾服未終伯母又亾文愛居喪持服六年

哀毀骨立鄉人魏仲賢等相與標其孝義

魏書節義傳

元

張宏毅七世同居一門孝友長幼敦睦財無私蓄

修武縣志

卷八

人物志

孝友

五

有連理槐生焉詔旌其門名所居地為孝義鄉

舊志

員思忠以篤孝稱

見元史孝友傳總序

明

馬澗宏治甲子舉人仕樂昌縣知縣告歸性孝友

父病為嘗糞及卒哀毀踰禮孝事母至老不衰撫

弟澍尤篤厚何塘志其墓

府志

馬恂庠生少失怙事母田氏至孝母病祝天願以

身代病獲安母復患癰恂吮癰注藥癰亦平及母

卒廬墓三年時有雙白鵝巢于樹人至不驚

舊志

高延壽割股療親有司給粟布優養

府志

薛復亨苦志力學母郭氏病醫藥不效復亨祝神

願以身代母壽十年是夕母感異夢遂愈復亨果
先母十年卒舊志

趙小二母封氏患風疾歿廬墓二年

王三聘庠生少失恃事繼母以孝行稱舊志

路坦然字人路崇禎壬午舉人事繼母至孝與弟

浩然同居終身撫諸姪如子少穎悟書過目不忘

成就門下士甚眾舊志詳見吳周聚請祀鄉賢議

張進寶幼為張氏養子張卒後有子若孫數人家

道中落進寶乃開旅舍於市暇則灌園以供朝夕

竭力經營不辭勞悴有旅人遺金盈篋進寶待其

來覓即還之封識宛然後娶婦進寶抱甕烈日中

修武縣志 卷八 人物志 孝友 三

新婦提饁餉乘閒言力此何為進寶曰舉家衣食

全在此婦曰誰是一家無乃自苦進寶大怒曰汝

欲閒我母子兄弟耶即逐之終身不復娶聚珩集

國朝

侯殿邦庠生幼孤母病日侍湯藥衣不解帶者數

年舊志

王士元庠生遭亂賊掠其母往救之不避鋒刃卒

致母還舊志

高應雷秉性醇謹事親至孝舊志

吳周郁字文軒天性醇厚少貧事父母色養備至

與弟周聚相友愛有李氏子其父母停柩未葬將

歿泣語郁郁出己資葬之薛氏兄弟不睦不務正業郁曲諭之遂相友愛改悔前非其以德感人如此

舊志

范繼武字靖寰性伉爽惇宗誼范氏洪武初卜遷塋於城南後子孫聚阡以地隘有議析葬者武愕然曰今日一析後世子孫必有不識祖宗墳墓者何弗就舊塋而拓之遂以己地增入十餘畝不受價值族人勒石誌其事

舊志

梁淇字衛北幼失怙恃事祖母以純孝稱居家嚴肅課子孫讀書不預外事與人恂恂和易無競

邱緣孔字宗聖郡庠生父為園性友愛緣孔遵守

修武縣志

卷八

人物志 孝友

美

父志四世同居

舊志

金傳龍邑舉人吳周聚為之傳曰傳龍其先浙之會稽人也曾祖徽舉孝廉官順天治中卒葬於燕之薊有子七人傳龍祖應彪官山東州司馬其季弟為山西興縣令迎母張孺人就養孺人卒旅葬任所應彪解組後客遊修武遂家焉生子五其三子泮生傳龍幼有至情時應彪已故每戲大母前以博歡稍長聞諸父道曾祖父母壠各在千里外遠不能祭埽計無所出傳龍曰此不在天之外但有道里資行即負至耳何痛為其季父濤且泣且喜質貸以與之即日就道既至晉不識其處訪詢

弗可得徬徨阡陌間仰天痛哭忽一老人過而問焉告以故老人歎曰余故守塋者孺子不遇余虛此行矣導以往披榛莽示之乃拜於墓下手白發壙遂以布裹遺骸負之歸傳龍年既少生長里間未嘗違適一旦負重徒步二千餘里風雨飢寒交困之趾裂肩腫面目黧黑家人幾不能識居無何復與濤言曰曾祖母之骨已還矣燕薊之行庸可緩乎於是濤又以舊質之產計餘值索之兩人偕以往不再月復奉徽之骨以歸備棺衾與曾祖母合葬焉於是覃懷之士聞之咸咨嗟歎息有淒然泣下者余因之有慨焉世之人棄親弗顧私妻子惜筋力生不能養死遂忘之比比皆是也金生年不滿二十貧窶無聊誰復責以大義然而天性激發不避艱苦踰峻嶺越重關期於必得其志而其季父濤亦始終玉成之非至誠之感動而能若是乎嗚呼此足以風世矣

王蘭父病割股以進疾旋愈

舊志

吳屏字對揚庠生父周聚以學行推重鄉里母李割股愈舅疾俱有傳屏性孝友貧而能廉周聚老疾臥牀者數年盡心侍養無倦聞有孝養節烈事必力爲表揚

府志

劉瑄字信公附監生以孝友稱

府志

王太和字景祥邑廩生性孝友撫弱姪如己子教之成立采訪

姬恆貞邑庠生事繼母孝謹朔望必以時物薦祖考至老不懈無子年七十餘舉二子咸以為孝行所致平生濟貧拯乏獎進後學綽有古風云采訪

王鍾文附貢生篤親誼與姪析爨悉以沃產與之人多其德采訪

梁綸字聖謨乾隆辛巳七月沁河決夜半水抵縣城不沒者數版時其父廷機居韓邨別墅當水衝綸越城出或登屋疾呼以水勢洶涌止之綸泣曰父母陷溺何以生為桴木抵父所相抱泣架木巢

修武縣志

卷八

人物志 孝友

五

居水退得全采訪

梁純庠生素篤友愛以季弟綬拙于生業推良田與之其孫模登賢書人謂善報采訪

宋三聘天性純篤事親以孝聞乾隆間父長貴患惡瘡醫言非得大螺不治時值隆冬三聘鑿冰入水摸得大螺三研塗患處瘡遂愈人嘉其事可與王祥臥冰相媲采訪

梁進賢字國才太學生性誠懇嘗割肉以奉別居世父有族父某無子為生養死葬歲祀無缺或負其債窘甚欲棄屋以償遽折券遣去後其人以怨報有違言不校也生二子長監生殿卿次武生殿

鼇殿卿生庠生悅孔悅孔生庠生希曾希曾生五福五世同堂年登髦耄邑令旌其門采訪

楊述先字繩遠五世一堂伯兄失明事之甚謹仲

兄早逝撫二孤如己出縣令朱表為義門壽八十

八及今六世家尚同居采訪

谷斌五世一堂人無閒言壽九十二卒采訪

鄭世旺孝弟傳家六世同居家無閒言采訪

原芳材聚仙掌人妻宰氏四胎生八子伯永廣永

富仲永昇永聚叔永法永魁季永興永全皆務農

芳材卒宰氏持家八子奉命惟謹及母卒或有過

舉長者持母所遺杖責之皆怡然順受家法嚴肅

修武縣志 卷八 人物志 孝友 堯

人尚廉恥采訪

張九錫監生孝友相承五世同堂嘗焚券卹窮買

婢後聞其有夫訪得之給匳使完聚采訪

蔣膺禮字允中太學生篤宗誼堂兄膺綬蚤卒姁

貧無依膺禮養之竝撫其二子一女無異己出皆

成立又有義弟膺禧友愛之如同胞膺禧卒教養

其子入邑庠父遺產析半與之采訪

沈廷士素履端方待人忠厚一門雍睦耕讀各有

專責年八十八及見元孫天麟采訪

樊繼曾推誠待人鄉黨族鄰隨時周卹子孫曾元

三十餘人年至八十餘采訪

趙玉田字生光貢生少孤事母至孝家素豐周急不怠有族姪錦貧無所依與同居俾得成立

采訪

義行

唐

孫泰山陽人少師皇甫穎操守有古風姨病篤以二女託之曰吾長女損一日汝可娶其次姨卒泰娶其長者或詰之曰人有廢疾非泰何適嘗置別墅用錢二百緡居兩月俾其人他徙有老嫗痛哭數日泰問之曰老婦舊事姑於此子孫不肖爲他人所有故悲耳泰惻然久之因給曰吾適得京書已別除官不復駐此且命爾子掌之言訖而去壽

修武縣志

卷八

人物志

義行

卒

九十終子展進士世爲顯官

舊志

明

薛文濟正統閒出米麥一千一百石助賑賜敕褒

之

舊志

王忠字希魯鐸之子懋之兄也正統五年歲大饑與周公直聶文秀朱成各出米麥豆一千一百五十石輸官佐賑有司奏聞英宗賜之敕曰國家施仁養民爲首爾能出米麥豆一千一百五十石用助賑濟有司以聞朕用嘉之今特賜敕獎諭勞以羊酒旌爲義民仍免本戶雜派差役四年尙克蹈忠厚表勵鄉俗用副朝廷褒嘉之意特敕正統五

年十二月二十二日

宋訪

徐麟字邦瑞昆弟四人麟居長析居時盡讓祖父田產與弟置別墅於岡上遂自號建岡世居習邨好俠尚義叔父經任福建滄岐大使卒子幼貧不能歸麟不遠數千里往迎歸葬舅氏王時臣以貢士卒於京邸又出資財遣弟鳳迎柩歸王氏墓葬焉去城十餘里舊有官荒地數頃力請於當道置為學田嘗患修武地糧不均民多逃徙與其友崔福詣闕伏奏者數次命下河南撫按官會議卒得平減里黨有貧乏不振者喜為之周卹善識時務多才能樂為人謀事以赴難解危為任卒於嘉靖

修武縣志

卷八

人物志 義行

空

丙寅年六十有五子二崇仁崇道

節采邑人張滋墓碣銘

王伯鉉字肖川以邑庠入太學紹興府教授思智之子也事親得歡心歲大饑鄉族謀竄四方遂破產出粟全活甚眾家資因以中落訓導王璐為之

傳

宋訪

國朝

李白彊嘗以無子納妾及入門見女年甫及笄慨然曰子之有無命也吾年已老大此女何以終乎遂歸之見清河靈泉行人涉水甚苦捐資建橋三座往來德之

舊志

范興國當順治閒土寇竊發糾集鄉勇協力守禦

有司旌其門

舊志

李之焜字毓秀邑庠生其先爲陵川望族徙家修武至曾祖魁始漸著魁生桂桂生還醇以諸生爲邑典型子三之焜其仲也少習訓詁業然心薄之迺其至性過人家有擔石之儲有貨必應窶人之子以情告不惜瘖手足廢眠餐爲效智計其惡少爲閭里患苦者咸避之明季庚辰辛巳間羣盜騰起之焜與兄蚪雛勒保聚父老子弟教以曹誅五畀之法入持鉏耰棘矜樂爲之死河濟衛源斬木揭竿之眾所至成禽東萊王公漢由河內令再歲之閒晉秩撫軍倚以辦賊俄而王公沒自是遁跡

修武縣志

卷八

人物志

義行

李

長林與二三交契劇飲大醉醉後有談時務者輒醺以大白年八十猶矍鑠善飯子萼國子監生初以萼未舉子爲買妾馮氏於郡城馮入門掩面涕泗之焜問故曰妾姑嫜愛妾如女妾來姑嫜不知死所矣之焜慨然曰是孝婦也卽遣歸原聘金屬勿取償是歲萼生子名夢祥焉

節錄墓誌

范正繩字中阿天性孝友撫幼弟曲盡恩育尤好施與康熙四十七八年連歲荒歉煮粥賑濟全活

甚眾

舊志

范珥字漢珍監生候選縣丞家素豐好善樂施凡里中義舉有告必應捨棺木施棉衣歲以爲常康

熙四十七八年饑饉頻仍施糧三月有餘五十二年五十八年復兩遇歲凶設廠煮粥全活甚眾縣西平政橋歲久傾圮慨然捐資獨力興造未竟而卒子源貴踵而成之

舊志

辭道柱監生好義樂施雍正十年以北關房屋若干間捐入普濟堂總督王旌其門

舊志

范宏謨字做三乾隆丁卯科舉人輕財好施有里人崔氏子以貧廢學宏謨憐其才召與其子共讀飲食筆墨一切資給之遂獲有成又嘗應試覃懷同寓有蜀客尤某赴都病於旅舍饗飧莫繼慨然為延醫調治試畢攜歸居數月始痊復資之金為

修武縣志

卷八

人物志

義行

三

路費

舊志

趙文宗性好善於縣西十里許出資為棚暑月施襟自以年老恐不能久遂於其地建呂祖廟院並置田數畝為經費招道士焚修其中以作永遠之

計

舊志

范廷選字舜舉郡庠生慷慨好施屢出資財以助里黨之婚葬給棉布修道路凡義舉必身倡之年六十八始舉一子猶及見其成立孫技繁衍

采訪

王鳳喈邑庠生喜濟貧乏修橋梁平道路有負租者輒焚其券生平未嘗以厲色加人鄉黨以厚德稱之

采訪

趙文炳陸邨人乾隆六年歲荒出粟七十石以賑
饑邑令劉旌其門采訪

石建績常橋邨農人乾隆二十六年大水邨北校
尉營廬舍盡沒建績作木機日數往返全活甚眾
更拯一溺水婦人夜食之遣歸不問姓氏新蔣二
河有木橋均易以石行人便之采訪

梁廷機邑庠生精岐黃於貧家輒徒步往醫全活
甚眾采訪

楊述忽字理煩監生嘗置妾杜氏聞已許字人遣
還不追值於待王鎮東構庵施椽捐田十畝爲經
費行之五十餘年其地竟成邨落人稱楊理莊焉

修武縣志

卷八

人物志

義行

三

冬月賑貸里黨計人給粟不取償臨終命子孫除
田三十畝遵行毋替采訪

苗盈家貧好善雙槽口外官路南至土術術長數
十丈西傍土壤東臨高厓爲雨水沖壓恆徑乍阻
行旅屢壞屢修經二十餘年卒致堅固年八十餘
猶孜孜不懈采訪

鄭珏字連碧太學生性好施與鄰族婚葬不給者
輒俟之遇後進必力加獎勸常舉辭文清公語以
勛人曰讀書則人敬之爲善則鬼神敬之暑月於
雙槽口施椽三十餘年不倦命其子本清出資爲
書院經費學使吳公慈鶴給扁旌之壽七十八子

二本清貢生一清邑增生采訪

王蘭圃候選州同乾隆五十九年沁河決出米麥七百餘石以賑災全活甚眾嘉慶十八年捐入甯

城書院田一百八十九畝又捐入宗祠祭田一百

二十九畝子殿先登嘉慶癸酉賢書采訪

吳煥然字堯章歲貢生家貧授徒自給於路拾布囊內白金千兩坐守以待主至分其半以謝之不

受而去采訪

張太和字萬育素尚節義西南商過修武失皮貨一包值五百餘金為太和所得商尋貨返太和驗貨單即與之商謝以金帛不受邑令唐旌其門采訪

修武縣志

卷八

人物志 義行

畜

李青雲字峻峯西鄉前寨邨人入郡庠不喜科舉聚漢以來書山經地志無所不窺語列朝興亾得失如指諸掌尤喜談經濟郡守孫公見其濬河論奇之邑令楊公下車投書一冊皆郡邑利弊遇滑亂問青雲城守計悉從之青雲再娶皆無子撫姪三人成立仍歲水旱一家食指二十人節畜治生不至飢困七旬以壽終節錄家傳

徐世春字梅久貢生輕財好義山西張某負債千金張歿其子將罄產以償取券焚之曰吾不忍汝孀孤無以為生也張德之以千金一介扁其門里有竊其草者隱之既又竊其牛乃面責而調之其

人自愧力改前非凡婚葬不給者輒飲之寒士應
試尤必餽贐焉宋

王慧先孟邨人武生劉永壽劉莊人監生嘉慶十
八年河以南大饑有中牟唐林者攜家渡河鬻子
於王爲僕其姻朱姓鬻女於劉爲婢一日王劉各
攜婢僕集親黨家僕見婢奔告王曰劉之婢吾所
聘婦也言已泣下王召唐與朱來詢之良是遂袖
金詣劉贖婢劉卻金慨然爲朱治裝剋期遣歸於
王合番成禮還其券不責值且以車送之河上宋
流寓

周

修武縣志

卷八

人物志 流寓

七

管夷吾戰國策卷三四國爲一篇姚賈曰管仲其
鄙人之賈人也南陽之敝幽魯之免囚桓公用之
而霸注修武南陽也仲穎土人嘗以貧困隱此敝
困幽隱也劉向說苑卷六管仲曰吾嘗與鮑子負
販於南陽吾三辱於市鮑子不以我爲怯知我之
欲有所明也

晉

嵇康字叔夜譙國錇人也其先姓奚會稽上虞人
以遊怨徙焉錇有嵇山家于其側因而命氏兄喜
有當世才歷太僕宗正康早孤有奇才遠邁不羣
身長七尺八寸美詩氣有風儀而土木形骸不自

藻飾人以爲龍章鳳姿天質自然恬靜寡欲含垢
匿垢寬簡有大量學不師受博覽無不該通長好
老莊與魏宗室婚拜中散大夫常修養性服食之
事彈琴詠詩自足于懷以爲神仙稟之自然非積
學所得至於導養得理則安期彭祖之倫可及迺
著養生論所與神交者惟陳畱阮籍河內山濤豫
其流者河內向秀沛國劉伶籍兄子咸琅琊王戎
遂爲竹林之游世所謂竹林七賢也戎自言與康
居山陽二十年未嘗見其喜愠之色康嘗采藥游
山澤會其得意忽焉忘返時有樵蘇者遇之咸謂
神至汲郡山中見孫登康遂從之游登沈默自守

修武縣志

卷八

人物志

流寓

矣

無所言說康臨去登曰君性烈而才儻其能免乎

康又遇王烈共入山烈嘗得石髓如飴卽自服半

餘半與康皆凝而爲石又於石室中見一卷素書

遽呼康往取輒不復見烈乃歎曰叔夜志趣非常

而輒不遇命也其神心所感每遇幽逸如此

節錄本傳

魏氏春秋曰康寓居河內之山陽縣與之游者未

嘗見其喜愠之色與陳畱阮籍河內山濤河內向

秀籍兄子咸琅琊王戎沛人劉伶相與友善游於

竹林號爲七賢鍾會爲大將軍所昵聞康名而造

之會名公子以才能貴幸乘肥衣輕賓從如雲康

方箕踞而鍛會至不爲之禮

節錄三國志注。晉河內太守阮德如答

嵇康詩二首早發溫泉廬夕宿宣陽城願野懷惆
悵言思我友生會遇一何幸及子邁歡情交際雖
未久思愛發中誠良玉須切磋璠璣就其形隋珠
豈不曜雕瑩啟光榮與子猶蘭石堅芳互相成庶
幾行古道伐檀俟河清不謂中離別飄飄然遠征
臨與執手訣良誨一何精佳言盈我耳援帶以自
銘唐虞曠千載三代不可并洙泗久已往微言誰
共聽曾參易簣斃仲由結其纒晉楚安足慕屢空
守以貞潛龍尚泥蟠神龜隱其靈庶保吾子言養
真以全生東野多所患暫往不久停幸子無損思
逍遙以自適雙美不易居嘉會故難常爰處憩
斯土與子遊蘭芳常願永遊集拊翼同迴翔不悟
卒永離一別為異鄉四牡一何速征人告路長願
步懷想像遊目屢太行撫輪增歎息念子安能忘
恬和為道基老氏惡強梁患至有身災榮子知所
康神龜實可樂明戒在剗腸新詩何篤穆申詠增
慨療舒檢話良訊終然承厭藏還誓必不食復與
同故房願子盪憂慮無以情自傷俟路忘所以聊
以酬來章

阮籍字嗣宗陳留尉氏人也容貌瓌傑志氣宏放

修武縣志

卷八

人物志 流寓

七

傲然獨得任性不羈而喜怒不形於色或閉戶視
書累月不出或登臨山水經日忘歸博覽羣籍尤
好莊老嗜酒能嘯善彈琴當其得意忽忘形骸時
人多謂之癡惟族兄文業每歎服之以為勝己由
是咸共稱異籍嘗於蘇門山遇孫登與商略終古
及棲神道氣之術登皆不應籍因長嘯而退至半
嶺間有聲若鸞鳳之音響乎巖谷迺登之嘯也

本傳

阮咸字仲容任達不拘與叔父籍為竹林之游太
原郭奕高爽有識量知名於時少所推先見咸心
醉不覺歎焉

節錄本傳

山濤字巨源河內懷人也父曜宛句令濤早孤居貧少有器量介然不羣性好莊老每隱身自晦與嵇康呂安善後遇阮籍更爲竹林之交著忘言之契康後坐事臨誅謂子紹曰巨源在汝不孤矣錄節

本傳

向秀字子期河內懷人也清悟有遠識少爲山濤所知雅好老莊之學莊周著內外數十篇秀迺爲之隱解發明奇趣振起元風讀之者超然心悟莫不自足一時也嵇康善鍛秀爲之佐相對欣然傷若無人又其呂安灌園于山陽康既被誅秀應本郡計入洛迺自此役作思舊賦云余與嵇康呂安

修武縣志

卷八

人物志

流寓

奕

居止接近其人竝有不羈之才然嵇志遠而疏吕心曠而放其後各以事見法嵇博綜技藝于絲竹特妙臨當就命顧視日影索琴而彈之逝將西邁經其舊廬于時日薄虞淵寒冰淒淒鄰人有吹笛者發聲寥亮追思曩昔遊宴之好感音而歎故作

賦曰

將命適於遠京兮遂旋反而北徂濟黃河以汎舟兮經山陽之舊居瞻曠野之蕭條兮息

余駕乎城隅踐二子之遺跡兮歷窮巷之空廬歎黍離之愍周兮悲麥秀於殷墟惟古昔以懷人兮心徘徊以躊躇棟宇在而弗毀兮形神逝其焉如昔李斯之受罪兮歎黃犬而長吟悼嵇生之永辭兮顧日影而彈琴託運遇於領會兮寄余命於寸陰聽鳴笛之慷慨兮妙聲絕而復尋佇駕言其將邁兮遂援翰而寫心

本傳

王戎字濬冲瑯邪臨沂人幼而穎悟神采秀徹視

日不眩裴楷見而目之曰戎眼爛爛如巖下電少
阮籍二十歲而籍與之交累遷侍中司徒戎爲人
短小任率不修威儀善發談端當其要會嘗經黃
公酒壚下過顧謂後車客曰吾昔與嵇叔夜阮嗣
宗酣飲于此竹林之遊亦預其末自嵇阮云叵吾
便爲時之所羈繼今日視之雖近邈若山河節錄本傳
劉伶字伯倫沛國人放情肆志常以細宇宙齊萬
物爲心與阮籍嵇康相遇欣然神解常乘鹿車攜
一壺酒使人荷鍤而隨之謂曰死便埋我其遺形
骸如此嘗醉與俗人忤其人攘袂而前伶徐曰雞
肋不足以安尊拳其人笑而止未嘗措意文翰惟

修武縣志

卷八

人物志

流寓

堯

著酒德頌一篇節錄本傳

宋顏延年五君詠阮步兵兵阮公雖淪跡識密鑿

亦洞沈醉似埋照寓辭類託諷長嘯若懷人越禮

自驚取物故不可論途窮能無慟嵇中散中散

俗迂流議尋山洽隱淪鷲翻有時鍛龍性誰能馴

榮色豈能眩韜精日沈飲誰知非荒宴頌酒雖短

章深衷自此見阮始平仲容青雲器實稟生民

秀達音何用深識微在全奏郭奕已心醉山公非

虛觀屢薦不入官一麾迺出守向常侍向秀甘

淡薄深心託豪素探道好淵元觀書鄙章句交呂

既鴻軒攀嵇亦鳳舉流連河裏遊惻愴山陽賦

呂安字仲悌東平人冀州刺史招之第二子志量

開曠有拔俗風與嵇康善每一相思千里命駕嘗

寓居山陽向秀思舊賦所云與嵇康呂安居止相

逝者也節錄本傳

孫登字公和汲郡共人也無家屬於郡北山爲土窟居之夏則編艸爲裳冬則被髮自覆好讀易撫七絃琴見者皆親樂之性無恚怒人或投諸水中欲觀其怒登既出便大笑時時游人間所經家或設衣食者一無所受辭去皆捨棄嘗住宜陽山有作炭人見之知非常人與語不應文帝聞之使阮籍往觀既見與語亦不應嵇康又從之游三年間其所圖終不答康每歎息將別謂曰先生竟無言乎登迺曰子識火乎火生而有光而不用其光果在於用光人生而有才而不用其才而果在於用才故用光在乎得薪所以保其耀用才在乎識真

修武縣志

卷八

人物志

流寓

辛

所以全其年今子才多識寡難乎免於今之世矣子無求乎康不能用果遭非命仍作幽憤詩曰昔蔥柳下今愧孫登或謂登以魏晉去就易生嫌疑故或嘿者也竟不知所終

隱逸傳

案九州要記云天門山有三水嵇康采藥逢孫登彈七絃琴卽此山杜鴻漸百家巖寺碑云若夫奇檀修竹嵇竈孫臺可知登與阮籍嵇康游亦嘗寓居天門山中也

趙至字景直代郡人也年十四詣洛陽游太學遇嵇康於學寫石經徘徊視之不能去而請問姓名康曰年少何以問邪曰觀君風器非常所以問耳

康異而告之後迺入到山陽求康不得而還又將遠學母禁之至遂陽狂走三五里輒追得之年十六遊鄴復與康相遇隨康還山陽改名浚字允元每日卿頭小而銳瞳子白黑分明有白起之風矣康卒詣張嗣宗隨到潁川欲因入吳而嗣宗卒迺向遼西而占戶焉

文苑傳

樂廣字彥輔清陽人父芳早卒廣僑居山陽寒素爲榮人無知者

本傳

隋

盧太翼字協昭河閒人也本姓章仇氏七歲詣學日誦數千言州里號曰神童及長閒居味道不求

修武縣志

卷八

人物志

流寓

三

榮利博綜羣書爰及佛道皆得其精微尤善占候算麻之術隱於白鹿山數年徙居林慮山茱萸嶺請業者自遠而至初無所拒後憚其煩逃於五臺山地多藥物與弟子數人廬於巖下蕭然絕世以爲神仙可致皇太子勇聞而召之太翼知太子必不爲嗣謂所親曰吾拘逼而來不知所稅駕也及太子廢坐法當死高祖惜其才而不害配爲官奴久之乃釋其後目盲以手摸書而知其字仁壽末高祖將避暑仁壽宮太翼固諫不納至於再三太翼曰臣愚豈敢飾詞但恐是行鑿輿不反高祖大怒繫之長安獄期還而斬之高祖至宮寢疾臨終

謂皇太子曰章仇翼非常人也前後言事未嘗不
中吾來日道當不反今果至此爾宜釋之及煬帝
卽位漢王諒反帝以問之翼曰上稽元象下參人
事何所能爲未幾諒果敗帝常從容言及天下氏
族謂太翼曰卿姓章仇四嶽之冑與盧同源於是
賜姓爲盧氏大業九年從駕至遼東翼言於帝曰
黎陽有兵氣後數日而元感反書聞帝甚異之數
加賞賜太翼所言天文之事不可稱數事關祕密
世莫得聞後數載卒於雒陽

隋書本傳

唐

崔良佐元翰之父滑州靈昌人與齊國公日用從昆弟也擢

修武縣志

卷八

人物志

流寓

三

明經甲科補湖城主簿以母喪遂不仕治詩易書

春秋誤演範忘象渾天等論數十篇隱共北

當作西

白鹿山之陽卒門人共諡曰貞文孝父

新唐書崔元翰傳

杜鵬舉鴻漸之父濮陽人與盧藏用隱白鹿山以母疾與

崔沔同受醫蘭陵蕭亮遂窮其術歷右拾遺元宗

東行河因游畋上賦以風終安州刺史

新唐書杜暹族子鴻

傳

盧藏用字子潛幽州范陽人能屬文舉進士不得

調與兄徵明偕隱終南少室二山學練氣爲辟穀

長安中召授左拾遺歷吏部黃門侍郎修文館學

上遷黔州長史判都督事卒

本傳不言隱白鹿蓋先白鹿而後終南也

宋

劉昌祚字子京真定人父賀戰沒於定州錄爲右班殿直主秦州威遠砦青塘聚兵鹽井經年不散昌祚奉帥命往詰之諸酋曰聞漢家欲取吾井鹽昌祚曰國家富有四海何至與汝爭此邪與酋俱來犒賚之歡然帥眾去遷西路都巡檢使遼還神宗臨試馳射授通事舍人夏人寇劉溝堡昌祚領騎二千出援虜伏萬騎於黑山而偽遁卒遇之戰不解薄暮大會突而前昌祚抽矢一發殪之餘眾悉遁帥李師中上其功曰西事以來以寡抗眾未有如昌祚者知階州討平母家等族又平疊州轉

修武縣志

卷八

人物志

流寓

三

作坊使爲熙河路都監從王中正入蜀破箠篋羌加皇城使榮州刺史秦鳳路鈐轄又加西上閣門使果州團練使知河州元豐四年爲涇原副都總管王師西征詔與總管姚麟率蕃漢兵五萬受環慶高遵裕節制令兩路合軍以出旣入境而慶兵不至昌祚出胡盧川次磨臍隘夏眾十萬扼險不可前昌祚挾兩盾先登夏人小卻師乘之斬首千七百級進次鳴沙川取其窖粟遂薄靈州城未及闕先鋒奪門幾入遵裕馳遣使止之昌祚曰城不足下脫朝廷謂我爭功柰何令按甲勿攻是夕慶兵始距城三十里而軍遇敵接戰昌祚遣數千騎

赴之遲明賊已退遂謁遵裕裕訝應援之緩有諫
昌祚意既見問下城如何昌祚曰比欲攻城以暮
府後未敢前日磨臍之戰夏眾退保東關若乘銳
破之城必自下遵裕弗內曰吾夜以萬人負土囊
傳壘至旦入矣怒未解欲奪其兵付姚麟麟不敢
受乃已明日遣昌祚巡營凡所得馬糧悉爲慶兵
所取涇師忿譟遵裕圍城十八日不能下夏人決
七級渠以灌遵裕師軍遂潰卽南還復命涇師爲
殿昌祚手劔水上待眾濟然後行爲虜所及戰退
之至渭州糧盡士爭入無復行伍坐貶永興軍鈐
轄明年復徙涇原加龍神衛四廂都指揮使知延

修武縣志

卷八

人物志

流寓

書

州時永樂方陷士氣不振昌祚先修馬政令軍中
校技擊優者乃給焉自義合至德靖砦綿亙七百
里堡壘䟽密不齊烽燧不相應昌祚度屯戍險易
地望遠近事力彊弱立爲定式上諸朝夏人寇塞
門安遠砦拒破之殺其統軍葉忩麻咩叱埋二人
蓋始謀攻永樂者圖其形以獻帝喜遣近侍勞軍
哲宗立進步軍都虞候雄州團練使知渭州歷馬
軍殿前都虞候渭地宜牧養故時弓箭手人授田
二頃有馬者復增給之謂之馬口分地其後馬死
不補而據地自若昌祚按舉其法不二年耗馬復
初又括隴山閒田得萬頃募士卒五千別置將統

之勁悍出諸軍右朝廷歸夏人四砦昌祚以爲不可再遷殿前副都指揮使冀州觀察使武康軍節度使年六十八卒贈開府儀同三司謚曰毅肅昌祚氣貌雄偉最善騎射箭出百步之外夏人得箭以爲神持歸事之所著射法行於世

宋史本傳

案本傳昌祚繫籍真定其生平事蹟多在秦鳳涇原環慶等路至其寄居修武史家未嘗一言及之也今據勝果寺鍾款載修武縣伏珠山毅肅公墳寵勛院鍾知昌祚墳院在此又百家巖東嶺經幢載毅肅遺表爲道凝請賜紫衣知昌祚與此邑寺僧往還嗣又於縣北方莊伏珠坡山後訪得昌祚

修武縣志

卷八

人物志

流寓

七

之墓雖邱壠已平豐碑不存而龜首尙翹然田畔於荒榛中獲殘石數段所敘皆元豐間與西夏構兵事亦有嘗曰修武之語則修武爲昌祚舊遊之地身後遂葬於此咸確有可據故援馮敏昌孟縣志收入郝經之例竝其本傳載入之又案李燾續資治通鑑長編元豐三年十一月知代州劉昌祚言瓶形寨地有北人欲取直路趨團山鋪臣已諭本寨回答不可令希覲侵越本傳不言昌祚知代州是可補史之缺也又畫墁錄載昌祚云某把弓萬事皆忘其說當詳所著射法中惜是書久佚不可復攷矣

金

史庭玉字德秀其先榮澤人祖士舉字仲升貞祐之亂避於太行保聚失守老幼皆出降仲升義不受辱投絕澗死庭玉徙居山陽

中州集

方外

上古

甯封子為黃帝陶正有人過之為其掌火能出五色煙久之以教封子封子續火自燒隨煙上下人

視鑪中猶有骨葬太行山間

詳見沿革

案舊志載瑕邱仲賣藥於甯係太甯城詳見沿革

晉

修武縣志

卷八

人物志

方外

七六

王烈字長休邯鄲人也常服黃精及鉛年三百六十八歲猶有少容登山歷險行步如飛嵇叔夜甚敬愛之數數就學共入山遊戲采藥後烈獨之太行山中忽聞山東崩地殷殷如雷聲烈往視之迺見山破石裂數百丈兩畔皆青石石中有一穴口經闊尺許中有青泥流出如髓烈取泥試丸之須臾成石如投熱蠟之狀隨手堅凝氣如粳米飯嚼之亦然烈吞數丸如桃大用攜少許歸迺與叔夜曰吾得異物叔夜甚喜取而視之已成青石擊之錚錚如銅聲叔夜即與烈往視之斷山已復如故

吳志

魏夫人諱華存字賢安任城人晉司徒劇陽文康公舒之女也少讀老莊性樂神仙攝生夷靜常欲別居閒處父母不許年二十四彊適太保掾南陽劉幼彥生二子璞遐幼彥後為修武令夫人心期幽靈精誠苦盡迨子息麤立離隔室宇清修百日太極真人安度明東華大神方諸青童扶桑碧阿湯谷神王景林小有仙女清虛真人王哀來降青童日清虛爾師也王君乃命侍女出入素隱身大洞真經高仙羽元等書三十一卷手授夫人景林又授夫人黃庭內景經徐別去已而幼彥以暴疾殞世值荒敵夫人攜細小徑來東南守靜之思與日而進也在世八十三年以成帝咸和九年託形仙化夫人遂修齋

修武縣志

卷八 人物志 方外

七

讀經積十六年顏如少女白日升晨太微天帝致命授位為紫虛元君領上真司命南嶽夫人使治天台大霍山洞臺節錄顏魯公魏夫人仙壇碑銘案王君授夫人甘草丸服之而仙為晉元康九年季冬降於汲郡修武縣廨內夫人時應年四十九歲

北齊

慧思姓李氏修武人以大小乘定慧等法根引喻俾習慈忍行奉菩薩三聚戒衣服率用布寒則加以艾天保中駐錫光山縣靜居山梵天院通志稠禪師鄴人也初落髮為沙彌時輩甚眾每休暇常角力騰趨為戲而禪師以劣弱見凌給侮毆擊者相繼禪師羞之迺入殿中閉戶抱金剛足而誓

曰我以羸弱爲等類輕負爲辱已甚不如死也汝以力聞當祐我我捧汝足七日不與我力必死於此無還志約旣畢因至心祈之初一兩夕恆爾念益固至六日將曙金剛形見手執大鉢滿中盛筋謂稠曰小子欲力乎曰欲念至乎曰至能食筋乎曰不能神曰何故稠曰出家人斷肉故耳神因操鉢舉匕以筋視之禪師未敢食迺怖以金剛杵稠懼遂食斯須入口神曰汝已多力然善持教勉旃神去且曉迺還所居諸同列問曰豎子頃何至稠不答須臾於堂中會食食畢諸同列又戲毆禪師曰吾有力恐不堪於汝同列試引其臂筋骨彊勁

殆非人也方驚疑禪師曰吾爲汝試因入殿中橫躡壁行自西至東凡數百步又躍首至於梁數四迺引重千鈞其拳捷驍武動駭物聽先輕侮者俯伏流汗莫敢仰視禪師後證果居於林慮山入山數千里搆精廬殿堂窮極土木諸僧從其禪者常數千人齊文宣帝怒其聚眾因領驍勇數萬騎躬自往討將加白刃焉禪師是日領僧徒谷口迎候文宣問曰師何遽此來稠曰陛下將殺貧道恐山中血污伽藍故至谷口受戮文宣大驚降駕禮謁請許其悔過禪師亦無言文宣命設饌施畢請曰聞師金剛處祈得力今欲見師效少力可乎稠曰

昔力者人力耳今爲陛下見神力欲見之乎文宣曰請與同行寓目先是禪師造寺諸方施木數千根臥在谷口禪師咒之諸木起空中自相搏擊聲若雷霆鬪觸摧折續紛如雨文宣大懼從官散走文宣叩頭請止之因敕禪師度人造寺無得禁止後於并州營幢子未成邁病臨終歎曰夫生死者人之大分如來尙所未免但功德未成以此爲恨耳死後願爲大力長者繼成此功言終而化至後三十年隋帝過并州見此寺心中渙然記憶俄似舊修行處頂禮恭敬無所不爲處分并州大興營葺其寺遂成時人謂帝爲大力長者云

出紀聞及朝野僉載

修武縣志

卷八

人物志 方外

七九

案舊志云稠禪師法能伏虎今北山解虎坪其遺跡也未詳時代故志中或以爲晉人或以爲北齊或以爲唐人何文定公塘作五里源崇明寺記又以爲天寶時人考太平廣記雖未明言稠禪師居百巖寺然云入山數千里構精廬殿堂窮極土木百巖至林慮山不過三百里內且五里源崇明寺碑亦云稠禪師浴山構寺二十餘所與太平廣記脗合則百家巖寺爲稠禪師所建無疑矣又唐李百藥製化度寺邕禪師銘云依稠禪師稠慧則稠公名慧也攷邕禪師銘作於貞觀五年在邕禪師旣歿之後而邕禪師實稠禪師之弟子則稠禪師

為高齊時人亦無疑百家巖大殿旁壁上有唐大中八年重建法堂記云暨乎齊代長老稠公宴息茲山以立基築益可徵信又云周末神僧經巖時聞虎嘯之聲似解虎別為一人然周滅齊纔六七年即入隋時代甚近固非二人也

唐

孫逸人不知何許人唐錢起

天寶進士考功郎中

天門谷題

孫逸人石壁云

崖口亂流處竹深斜照歸主人臥

谷半芳菲雲棟綵虹宿藥圃蝴蝶飛惡鷲慕嘉遯

幾夜瞻少微相見竟何說忘情同息機 全唐詩

百巖大師諱懷暉姓謝氏東晉流寓今為泉州人孩提秀發博究書術一旦慨然曰我之祖先今安

修武縣志

卷八

人物志

方外

全

在邪四肢百體視聽動用孰使之然邪濯然雨泣改服緇褐志在楞伽行在曹溪得圓明清淨之本去妄想因緣之習百八句義照其身心心離文字化無方所於是抵清涼下幽都登徂徠入太行所至之邦蒙被法味止於太行百巖寺門人因以百巖號焉每歲召入麟德殿講論後以疾固辭元和

十年十二月二十一日恬然示滅其年六十

節錄

輿碑銘

考功郎中錢起贈相巖老人詩日與麋鹿羣賢哉買山叟龐眉忽相見遊世一何久林棲

古塵曲野事佳春後瓠葉覆荆扇粟苞垂麋隔獨

歌還獨酌不耕亦不穡燒田隔雲溪多雨長根莖

有 煙霞得情性身世同芻狗寄謝營道人天真此翁

雲泉獨樂命予賦詩古也憂婚嫁君能樂性腸長男棲月宇少女炫霓裳問爾餐霞處春山芝桂房

鶴前飛九轉壺裏駐三光與我開龍嶠披雲靜
堂胡麻兼藻綠石髓隔花香帝力言何有椿年言
漸長宵然高象外宣不做羲皇周賀贈柏巖
師詩野寺絕依念靈山會徧行老來披衲重病後
讀經生乞食嫌春遠尋溪愛路平多年柏巖住不
記柏巖名禮部尚書李益吳柏巖禪師詩徧與
傷人別臨終盡不愁影堂誰為埽坐塔自看修白
日鍾邊晚青苔鉢上秋天涯禪弟子空到柏巖遊

五代

劉海蟾名操字宗城燕山人為燕劉守光宰相遇
純陽授以丹書遁跡於終南太行之閒有入道歌

邱長春書之今石刻在馬坊邨吳志

宋

僧智深俗姓俎修武大陸邨人性喜佛幼出家慶
歷八年受戒為僧器宇嚴重臨事有剛斷為百家

修武縣志

卷八

人物志 方外

全

巖寺主贍百口眾為竹林游者恆講學於疊雲樓
上元符三年八月示寂年八十二

道凝大師俗姓賈修武人蚤歲師事智深精修梵
行熙寧八年遇同天節以掌御書恩例度為僧元

祐中寺主數易縣令欲得能贍眾者咸推大師以
膺其選出納營繕皆有渠度不數年殿寮修整香

積充盈武康軍節度劉昌祚遣表為請賜紫衣度
弟子十有九人大觀二年三月示寂年七十

案百巖有宋李子從以職事案諸屬邑及詣百巖
恭點御書題碣而道凝銘詞亦云熙寧八年以掌

御書恩例度為僧則宋時百巖曾貯御書僧掌之

官爲檢點題碣與銘固昭然可考也案兩宋諸帝多游心翰墨徽宗有御書千文及神夢記論者謂其行草正書筆勢勁逸高宗親書六經論語孟子刊石國學而開先者太宗也觀玉海所載雍熙三年飛白賜李昉端拱二年急就章付祕閣淳化中飛白玉堂賜蘇易簡至道三年飛白賜呂端又以四十軸藏中祕及名山勝地此百巖寺御書自係當日頒自朝廷而爲山林增輝者也

元

邱處機字通密山東棲霞人自號長春子嘗寓居修武縣清真觀研精元學世祖召見每言爲治在

修武縣志

卷八

人物志 方外

全

敬天勤民長生在清心寡欲世祖然其言命左右書之時悍兵踐蹂中原河南北尤甚民罹鋒鏑無所逃命處機使其徒持牒招之由是爲人奴者得復爲良民濱死而得更生者無慮數萬人

吳志

馬珏字元寶號丹陽子宣海富人也因遇王重陽食瓜異其白蒂因與之遊後授以丹訣五篇

吳志

譚處端初名玉字伯玉後名處端字通正號長真子世爲宣海人倜儻不事邊幅以孝義見稱於經史靡不涉獵尤工諸草隸因醉臥雪中卽感風痺之疾自知非藥石可療乃暗誦北斗經以求濟急忽夢大席橫空師飛起取之則諸星君坐其上師

拜其下恍然而覺自是歸道之心遂決世宗大定七年閒祖師在馬丹陽家徑往乞備門弟子列祖師畱宿庵中時嚴冬不任其寒祖師展足令抱之少頃汗出如置身甌中黎明以盥手餘水滌其面宿疾頓愈由是願推心終身事之他日妻嚴氏怪師不歸就詰其所以師遽離之祖師復嘉其勇斷遂授以祕訣立今名號十四年出關東至洛陽朝元宮迤邐至懷之修武有張八哥者如狂如癡識者以爲道一日倡言於市曰來者譚先生神仙之總管也二十一年復至洛陽朝元宮之東得隙地數畝築庵居之二十五年曲肱而逝至元六年贈

修武縣志

卷八

人物志

全三

長真雲水蘊德真人有水雲前後集行於世

節錄唐順

之史纂左編吳志作處機誤

劉處元字通妙號長生子武官人師重陽金主召

問對曰寡嗜欲則身安薄賦斂則國泰金主悅一

日鳴鼓集眾告以去期乃曲肱而逝

吳志

郝大通字太古號廣宣子宣海人雖師重陽而志

不苦勵長真輩共激之至岐山遇一人授以金丹

口訣遂遊燕趙閒能御風出沒不知所終

吳志

王處一字玉陽號全陽子宣海人居太行閒世宗

聞其名召對嫉者鳩之處一入水水涸不死

吳志

張八哥不知何許人見譚處端傳

國朝

杜明蟾武陟縣邱家莊人祖父皆儒生蟾少時於書無所不好精史學慨然欲有用於當世天啟中客魏弄權聞揚左請公祿禍遂絕意進取久之得古本參同契潛心玩味若有所得家貧賣絲宣郭東門外有求食取與之有道士自羅浮山來神骨清異明蟾烹佳茗以進道士喜見其案頭有參同契與講論益喜畱信宿遽出一編贈之迺張紫陽悟真篇也曰熟此當了元牝之義自是遂畱心內學又數年母死既葬而前道士適至引明蟾去去十七年無耗順治三年夏有道人負籠入東觀音

修武縣志

卷八

人物志

方外

十四

堂憩良久鄉老人誦觀其面疑是明蟾因走告其妻子詢之良是鄉人聚觀咸勸歸家明蟾無所答數人牽挽迄不能前籠中衲衣經卷蒲團數事昇之亦不可動因共伴宿堂中詰旦失所在越三四年修武天門山西北龍潭邨傳有道人來居跡甚異言貌類似明蟾其子因偕鄰人往觀果是山中人云邨舊無水每汲輒行三十里外道人指石壁處令鑿治得泉清冽而甘山恆苦蛇虎患道人來不一月諸毒咸遠徙居邨西石室中數月不見其食人往饋食食輒兼十許人牧人戲以大石室其門堅不可動逾四五日見道人盥漱石澗濱走視

門室如故啟視見道人跌坐巾履猶溼焉其子居石室三日邨人饋飲食甚恭初宣郭李杜才朱絨皆名諸生素善明蟾已二十餘年不相見聞其異共走山中覘之因問曰世果有仙乎願何修而得此日子不見周濂溪太極圖說乎無極而太極動而生陽靜而生陰一動一靜互爲其根此順則生人生物爲世之常道顛之倒之卽道家之理陳希夷刻其圖於華山矣萬物收歸太極太極歸無極此逆則爲丹是爲仙道且子不見日月乎初三月出庚月受明於日此坎離交姤得藥之象也望而月滿取任督之循環此乾坤交姤煉藥之象也既

修武縣志

卷八 人物志 方外

全五

望而月之光漸減復還於日是爲抽鉛添汞還丹之像也陳伯玉詩云太極生天地又曰古之得仙道信與元化并晦翁注參同契每與蔡西山論之惡在其無有乎二子唯唯歸而遽錄其語繹之不能盡解明蟾居龍潭山十三年一旦別山中人去曰將適峩眉謁吾師又曰爲語吾子其母死卽殮殮卽葬不可踰一日恐不利存歿人遂去去五日而其子至山中人以其父語告之子歸月餘母死如言殮葬葬後一日鄰人爨火不慎延燒數家社子之室蕩然以是益知其異也山中人又曰明蟾每深更運石如栲栳大登山至絕頂轉之下聲

壽聞數里雖疾風雨未嘗息不知其何意明蟾初

名傑自居龍潭山改號明蟾至今山中人猶稱之

云武陟縣志

補遺 列傳 補張導傳後

水經注濁漳水篇鉅鹿縣銅馬帝廟側有碑述河

內修武縣張導字景明以建和三年為鉅鹿太守

○一清案建和漢和帝年號張景明為袁紹說冀

州牧韓馥讓位事在獻帝初平二年相距四十餘

年不應如是之久建和字誤當作建安魏書臧洪

傳洪荅陳琳書曰昔張景明親登壇唾血奉辭奔

修武縣志

卷八 人物志補遺

全

走卒使韓牧讓節主人得地然後但以拜章朝主

賜爵獲傳之故旋時之間不蒙觀過之貸而受夷

滅之禍注臣松之案英雄記云袁紹使張景明郭

公則高元才等說韓馥使讓冀州然則讓

之讓位景明亦有其功其餘之事未詳則景明作郡宜在建安初年

而亦為紹所殺趙一清水經注釋

鄧世隆者相州人隋大業末王世充兄子太戍河

陽引為賓客秦王攻洛陽遣書諭太世隆報書夸

慢洛陽平亡命變姓名號隱元先生棲白鹿山貞

觀初召授國子主簿與崔仁師慕容善行劉顛庾

安禮敬播俱為修史學士終著作郎節錄新唐書本傳

列傳 補愈之前

韓睿素愈之祖魏安定王茂六世孫為桂州都督

府長史化行江嶺 皇甫湜韓文公神道碑

又 改補韓湘傳後

案方以智通雅韓退之南陽在修武非鄧州也南陽懷州修武縣有南陽城左傳曰晉於是始啓南陽即此智按韓退之正修武人今為懷慶府修武縣孟縣亦有韓愈別墅俗呼韓莊金石志載孟縣皇甫湜撰韓碑世人以鄧州之南陽為退之之里誤矣其稱昌黎者其先昌黎人也愈封昌黎伯今永平府昌黎縣有韓祠據此則韓文公本籍修武

修武縣志

卷八

人物志補遺

七

而祖父始葬於孟縣別墅耳乾隆元年奉部覆蒙恩世襲五經博士蓋亦猶江蘇孔氏與曲阜爭襲衍聖

公興訟

上諭以守墳墓者為大宗議準以曲阜襲爵之意其後河內博士韓法祖無子仍奉檄擇取修武牆南邨文公三十一代孫武生韓伯虎為嗣況安陽城即古南陽邨北韓坡韓氏上世祖墓尚存自不得以文公祖父之墓在孟縣致疑于文公之非修武人也

工部員外郎趙公傳

公姓趙氏諱遷字喬林號穆軒父海峯先生名三元廣東鹽運司邑志有傳公其冢嗣也幼嗜學經史及諸子百家無不精研嘉慶庚申恩科舉於鄉以屢上公車不第由土方例捐員外郎分工部屯田司行走兼管督催所製造庫事公篤於至行一稟天性隨海峯先生在都時母杜太夫人患痰迷症且失明公奉侍湯藥滌器滌衣數年不懈公在部勤慎奉公不事奔競值考軍機有人名在公後深患不得公白於執政讓之後其人竟敗辦理

萬年吉地工程執政重公廉能議委任之適有夤緣此

修武縣志

卷八 人物

六

差者公又讓之後以工不如式在事者俱被議譴誦人皆服其卓識公自奉儉約而愜慨好施與嘉慶十八年河北大饑時公丁內艱家居捨藥餌棺木捐置義田感動者甚眾滑濬之亂大帥聞修武有從匪者嚴檄搜捕民情惶懼時公避兵郡城郡伯袁太守因有葭苧親密詢於公公以全家力保其無太守轉白大帥民賴以安公在司主橐有年嚴拒苞苴管製造庫事所有陋規盡行裁革甲午科充順天鄉試對讀官親爲覆校屬吏有艸率從事者輒加席責不少貸其清操大率類此公在京師宦況清貧遇鄉人公車至都者無所居則館之

無所資則助之或爲推薦使得安硯以精其業又與毛芾邨侍郎勸捐勸建懷慶會館以備同郡求名者棲止之所則其待人之厚可知也公精於考證音義子弟讀經書皆手爲點定剖悉字義援引精詳且推丹大全頓讀句連讀法廣爲頓讀句聯氣名曰唯其是齋辨讀於聖賢語脈確有體會足以爲初學津梁都中講考據辨音義者皆推重公引退後余請公主講甯城書院屢年時相過從論文外未嘗一言及私事親族請託皆嚴拒之非節序晏會不入官廨足徵其立品之高也年七十七卒乙巳冬十一月葬王邨新阡余宰修武十三年

修武縣志

卷八 人物

完

習知公多隱德其子翼倬從余游來請余爲公傳余不得以謙陋辭因卽其在人耳目者著之於篇云子二翼伸業儒翼倬庠生女二孫二

公弟邀字容甫自號甯夫嘉慶庚午舉人丙戌會試大挑一等以知縣分發福建歷署福鼎屏南補章平縣君敏而好學年十七始得讀書不十年經史百家悉能精通補博士弟子員其時文尙藻采釋典稗官皆摛入篇君獨肆力于古不趨時好以故三十六歲始領鄉薦仍屢躋于禮部試然及門得其緒餘成進士入詞林者甚多雖宦游十餘年十三經猶成誦云君純孝性成其在都侍母疾

至數十晝夜不交睫兩目盡腫且厚于待人其與鄰救荒不吝於財能媿於賢昆而素戒奢靡居官多年猶著父遺舊衣冬則羊裘未嘗自製狐貉君在閩三充鄉試同考官闈卷有一長必錄有陳生中山文未精而詩獨冠場力薦之遂獲殿軍何生冠英文尚古與久困名場君閱卷得之曰奇才也因薦之甚力領戊子鄉解丙申以第二人及第其務拔真才如此故得人特盛福鼎俗生女多溺死君閱之爲戒溺女文愷切曉諭風遂息屏南處萬山中田多荒蕪君爲勸課農桑文本北方之法躬詣田閒口爲指授民皆鼓舞從事鮮游惰其效旣著

修武縣志

卷八 人物

卒

鄰境爭相倣效利賴甚廣至今歌頌不衰漳平邑屬山僻習俗刁悍自道光元二年後無登賢書者君於甲午夏蒞任卽擇地於城外東山捐建書院又四鄉各一皆延名師掌其教並嚴攷課親爲講說乙未卽鄉薦有人丙申又有捷南宮者此後竟科名不斷士林感激繪君像供各書院中邑素多盜離城三十餘里有觀音山尤爲盜藪商旅苦之君下車卽選幹練役並軍流犯壯健者親率往捕渠皆禽獲餘黨斂迹夜不閉戶者六七年君甫沒而盜復作後任諱之被盜者無所申訴莫不思君涕矣邑永福里陳氏聚族居族多豪富建宗祠

處春秋合祭演梨園至六七部費可巨萬族人移居他邑者皆攜貲來會茶坊酒肆倡賭咸集邨外平疇鬧如闐闐惡習相沿澆風日盛君爲文勸諭俾減其費之七爲義倉義學導之向善陳氏勒文於石以垂後感化者且買絲繡像焉君久於任如修橋濟人設倉備荒申冤枉抑豪彊禁催科吏擾之習絕捏控頂兇之弊惠政多端大憲以臺灣之鳳山屢荒後民多從匪諄使往治君因臺俗侈靡苞苴公行難猝化堅辭弗行後果土匪滋事君年六十五歲卒於官以貧滯於閩踰年始歸葬於父海峯先生墓側子翼仲廩貢生翼侄廩生女三長

修武縣志 卷八 人物

至

適溫縣刑部主事吳君謙吉其二幼孫男女各二